

# CA TITSA' TSE' NU CCA QUI' JESUCRISTUA NU BEDIA SAN JUAN

El Santo Evangelio Según

## SAN JUAN

---

**1** Antes càla cue' yétsiloyu nna, chilà dua Enne' née Titsa'. Titsa'a nna dúe lani Tata Dios, ná huée Dios nna. <sup>2</sup>Lèe nna dúe cuitta' Tata Dios dèsdeba néruá. <sup>3</sup>Iyábani ca cosa nna uccua çà por lèe. Cáalá làa por lèe nna, nìdi ttu cosa nu té nna labí uccua. <sup>4</sup>Lani lèe nna dua la'labàni. La'labàni nna nà la'yani' para ca enne'. <sup>5</sup>La'yani' nna rudàni'q le' chul'la. La'chul'la nna labí birialàniq guthòlq na. <sup>6</sup>Gùdua ttu ènne'yu' gùta' láa bi Juan. Guthel'la' Tata Dios bi nna, <sup>7</sup>bìta bi para cueqquia li bi nu cca qui' la'yáni'a, para qui'ni iyaba ca enne' nna tsáalatsi' quí por nu riquixa'a bi. <sup>8</sup>Álahua làbi nuá ná la'yáni'a, sino bìta bi para quixá'a bi qui' la'yáni'a. <sup>9</sup>Porqui'ni Enne' ná la'yani' lí gánia nna runne la'yani' qui' iyábani ca enne'. Lèe nna gul'lanie le' yétsiloyu. <sup>10</sup>Gurènie le' yétsiloyu nu benie, pero yétsiloyu nna labí benibí'q ne. <sup>11</sup>Bitée gurènie entre ca enne' quí'e nna labí beni çà ne

recibir. <sup>12</sup>Pero iyaba canu beni çà ne recibir de ríalatsi' quí quí'e nna, betie derecho qui' quí para cca çà yí'ni Tata Dios; <sup>13</sup>pero álahua por medio de réni, nìhua tì' ràlia ca enne' yétsiloyu, nìhua por la' calatsi' qui' ttu nubeyu' nna, sino Dios la nna née Tata qui' quí. <sup>14</sup>Titsa'a nna guýi'e forma de ènne'yu' nna, gurènie entre ri'u. Intu' nna bilá'ni tu' la'yani' quí'e nna ca milagro nu benie nna, tì' tegáláa tùteruba Yí'ni Tata Dios. Uccue enne' de puro taá favor, a'hua gutixe'e titsa' lígani nna. <sup>15</sup>Juáan nna gutixa'a bi nu ná lí acerca de lèe, gunne bi idìtsa nna ra bi: Bitola de inte' nna íl'lani ttu enne' adiru dacca' tì'chu inte', porqui'ni antes càla galia' nna chilà dúe. <sup>16</sup>Iyaba ri'u nna bànini ri'u de itute la'huacca quí'e; runie ri'u favor lani adí favor nna. <sup>17</sup>Tata Dios nna betie ley quí'e lani ca enne' chi gùtse'e por medio de Moisés. Pero favor quí'e lani ri'u a'hua evangéliui gula'lanie çà por medio de

Jesucristua. <sup>18</sup>Jamás lanú nūya ènne'ni le' yétsiloyu chi bilá'niq̄ Tata Dios. Tùteruba Ýi'ni áa enne' dua cuitta' áa, làbi nna chi beni bi e declarar lani ri'u.

<sup>19</sup>Guthel'la' canu rigú'ubia' entre ca enne' judío qui' Jerusalén tuchùppa ca sacerdote qui' qui' lani ca descendiente qui' Leví ru'a lo Juáan para inàba titsa' çà bi nūya ná bi. Juáan nna gutixà'a bi nu ná lí, <sup>20</sup>labí becàttsi' bi titsa', sino claru taá gutixà'a bi nna ra bi: Álahua inte' nuá Cristua. <sup>21</sup>Gunàba titsa' çà bi attu nna ra çà: Núlá nì'i. Tsí cuiq̄'lu' Elías acca. Ra tè bi: Labí ná'. Tsí cuiq̄'lu' profeta enne' ná qui'ni ìta inne parte Tata Dios acca. Becàbi bi nna ra bi: Labí. <sup>22</sup>Accana ra çà bi: Pues, núlá ná cuiq̄'lu' nì'i, para qui'ni equixá'ani tu' canu guthel'la' çà intu'. Biala ra cuiq̄'lu' qui' la'a mísmuba cuiq̄'lu' nì'i. <sup>23</sup>Juáan nna gunne bi idìtsa nna ra bi: Inte' nna daya' para gunia' predicar al aire libre taá. Lítsé'e leda porqui'ni chi dá' Señor. Porqui'ni anía gutixà'a Isaías enne' uccua profeta tiempo antigua.

<sup>24</sup>Canu huía mandádua nna uccua çà nu la'a mísmuba religión qui' ca fariséua. <sup>25</sup>Beni ba çà seguir gunàba titsa' çà Juáan nna ra çà: Bialacca runi cuiq̄'lu' bautizar ca enne' canchu álahua cuiq̄'lu' nuá' Cristo, ñihua Elías, ñihua profétaá nì'i. <sup>26</sup>Becàbi tè Juáan nna ra bi çà: Inte' nna runia' bautizar lani inda. Pero entre lebi'i bá chi du ttu enne' labí nabia'ni le, <sup>27</sup>là ènni'q̄' ènni'q̄' ná qui'ni il'ani bitola de inte', pero antes càla inte' nna chilá dúe. Nìdiruba làa dàcca'a' para ithátsia'

correa qui' guarachu qui'e. <sup>28</sup>Ca così nna uccua çà le' región qui' Betábara attu ládulá yò Jordán làti begàdia Juáan ca enne' inda.

<sup>29</sup>Attu yu'utsá nna bila'ni Juáan qui'ni dia Jesús làti du bía. Gunne tè bi nna ra bi: Nì da' Jesús enne' ná Carnérotu' qui' Tata Dios para quée sacrificar nna, enne' cúa ca tul'la' qui' yétsiloyu. <sup>30</sup>Qui' ènni'q̄' nuá gutixà'a' loti' nia': Bitola de inte' nna íl'ani tu ènne'yu' adiru dàqqe'e ti'chu la inte', porqui'ni ántesca galia' nna chilá dúe. <sup>31</sup>Inte' nna labí bennia' cuenta nūya née, pero para qui'ni quée presentar ru'a lo ituba yetsi Israel, acca inte' nna daya' runia' bautizar lani inda. <sup>32</sup>Juáan nna gùnneé ruhuá bi adí nna ra bi: Bilá' te' qui'ni Espíritu Santo nna huàdie de ÿiabara' ti'ba ttu becha to' nna gùdue íqqeie. <sup>33</sup>Labí bennia' cuenta nūya née, pero enne' guthel'le'le inte' huèni bautizar lani inda, lèe nna rée inte': Enne' ilá'ni lu' chadi Espíritu thúe íqqeie nna, là ènni'q̄' nuá guni bautizar lani Espíritu Santo. <sup>34</sup>Inte' nna bilá' ti' e nna riquixà'a' qui' Enni'q̄' nuá hualigani née Ýi'ni Tata Dios.

<sup>35</sup>Attu yu'utsá nna du Juáan attu vuelta lani chuppa ca discípulo qui' bía. <sup>36</sup>Bilá' tènì cabi qui'ni dia Jesús nía, acca gunne tè Juáan nna ra bi: Nì da' Jesús enne' ná Carnérotu' qui' Tata Dios. <sup>37</sup>Biyeni báni chuppa ca discípulo qui' Juáan nu ra bi nna tanó tè cabi Jesús nna, <sup>38</sup>bedèqqeie tè lo Jesús nna bilá'nie qui'ni denó cabi e, acca rée cabi: Biani reyila le. Becàbi tè cabi nna ra cabi e: Maestro, gani dua cuiq̄'lu'.

<sup>39</sup>Ra tìe cabi: Lítaáruhuá inna' le. Huía tèt cabi lani e nna bila'ni cabi làti dueáa. Tsá lània nna nía ba beyà'na cabi, porqui'ni chi ra'la.

<sup>40</sup>Andrés bettsi' Simón Pedrua nna uccua bi ttu canu chuppa biyéni cabi nu ra Juáan nna tanó tèt cabi Jesús. <sup>41</sup>Primérute Andrés nna betseláni bi bettsi' bi Simóa nna ra bi: Chi bila'ni tu' enne' ná qui'ni ita para gudilèe ri'u, quiere decir Cristua enne' ribèda ri'u. <sup>42</sup>Andrés nna guche' tèt bi bettsi' bía ru'a lo Jesús. Bila'ni Jesús bi nna rèe bi: Lu' ná lu' Simón ÿi'ni Jonás, pero gata' láa lu' Cefas. Cefas nna quiere decir Pedro. <sup>43</sup>Attu yu'utsá nna beni Jesús disponer tsíe Galilea. Yù'u bée néda nna bettsà' tìe Felipea nna ra tìe bi: Gutà, tanó inte'. <sup>44</sup>Felípea nna uccua bi ttu enne' Betsaida, yetsi qui' Andrés nna Pedrua nna. <sup>45</sup>Felípea nna huía bi làti dua Natanael nna ra bi: Chi bila'ni tu' enne' ga'na escrito nu cca quì'e lo ley nu bedia Moisés, a'hua lo ca libro nu bedia ca profeta nna: Jesús ÿi'ni José, enne' Nazaret. <sup>46</sup>Ra tèt Natanael bi: Tsí ína ri'u Nazaret la iria tsagá ttu enne' tsè' cá. Ra tèt Felípea bi: Gutà tsáruhuá inna' lu'. <sup>47</sup>Loti' Jesús nna bila'nie Natanael qui'ni dia bi làti dùe nna, gùnnie qui' bi nna rèe: Nì da' ttu nu hualigani nà enne' Israel nu labí beÿia té lani a. <sup>48</sup>Natanael nna ra tèt bi e: Gani benibia' cuiq'lu' inte'. Becàbi Jesús nna rèe bi: Antes càla gaÿi Felípea' lu', loti' dù lu' ÿà yexxuhuía nna, bilá' te' lu'.

<sup>49</sup>Natanael nna ra tèt bi e: Maestro, cuiq'balu' ná ÿi'ni Tata Dios, ná huá cuiq'lu' rey qui' yetsi Israel.

<sup>50</sup>Jesús nna rèe bi: Tsí porqui'ni pá'a' lu' qui'ni bilá' te' lu' du lu' ÿà yexxuhuía acca ríalatsi' lu' cá. Pues, adírlulá ca milagro xeni tì'chula ca nui chì' ilá'ni lu'. <sup>51</sup>Raáruhué: Hualigani te' nia' le, qui'ni dèsdeba anna para nu chì' da'la nna ilá'ni le yalia ÿiabarara; a'hua ca ángel qui' Tata Dios tsappi chadi cabi nna itsina' cabi iquua Nubeyu' de ÿiabarara.

**2** Tsunna ubitsa bitola de lània nna uccua ttu thá'a le' yetsi Caná qui' Galilea. Nàna qui' Jesús nna re' tèt bi nía. <sup>2</sup>Beni huá ca invitar Jesús lani ca discípulo qui'áa thá'a. <sup>3</sup>Chi bebtsi vino qui' caniá, acca nàna qui' Jesús nna ra bi e: Vino reyàtsa qui' quì. <sup>4</sup>Jesús nna rèe bi: Biecca ra lu' inte' á', niula. Labí chi gùl'la' hora quia'. <sup>5</sup>Nàna qui'áa nna ra tèt bi canu tsè' mandádua: Iyate nu íneé nna guni le. <sup>6</sup>Nía nna dàa xùppa ca yethu' nu de íyya para inda nu ruquina' ca enne' judíua para eyacca nàrini ca según bá costumbre qui' quì. Ttu ttu ca yéthu'a nna ùccuaní ttú chuppa o tsunna tì'ga ré'è inda lè'e quì. <sup>7</sup>Jesús nna rèe ca: Líúditsa' ca yéthu'ì inda. Làca nna beditsà' tí'ní ca ca yéthu'a inda. <sup>8</sup>Làniana rèe ca: Annana ligàppi' a nna tahu'a' tèt le tí'to' gunixi nu ná encargado qui' fiéstì. Làca nna aníabá beni ca. <sup>9</sup>Nu ná encargado qui' fiéstaa nna de benixiá indaa nna chi nà vino. Nìdi làa yùà gáÿalá taxi' ca vínuá, sino làteruba canu runi mandádua hua yù ca porqui'ni làca nna gutàppi' ca indaa. Là nna gutàÿia nubeyu' nu ruttsan'áa nna, <sup>10</sup>ra' na: Iyaba ca enne' nna rigá'a ca yà'latè vino tsè'

nna ri'ya díbá canu nàyi i'zeni vino nna, làniálá rigá'a cã nu hua'yaia' bá ná tsè'. Pero lu' nna gutua bá lu' vino tsì'ij para bitola. <sup>11</sup>Primerò milágru'ij nna beni Jesús le' yetsi Caná qui' Galilea nna belui'e la'huacca quì'e de ÿiabara'. Ca enne' ruthète'niáa nna huíalatsi' cabi e. <sup>12</sup>Guttè díbá thá'a nna betsina' cabi yetsi Capernaum: lèe nna nàna qui'áa nna ca bettsi' áa nna ca discípulo qui'áa. Níabá gutsé'e cabi tuchùppa ubitsa to'.

<sup>13</sup>Chì' tegáabá debiga' fiesta qui' ca enne' judúa nu reya cã pascua nna, huía Jesús Jerusalén. <sup>14</sup>Nía nna bilá'nie canu tsè'e huètti' ca gù'na l-le ca carnero l-le ca becha l-le a'hua canu ritsila bel-liu, iyaba cã nna ÿù'a cã le' templua. <sup>15</sup>Beni tìe ttu cuarta nu de yéti nna bebèqqiue iyate cã fuera templua tsà'tsela tehuá ca gù'na qui' qui' l-le, ca carnero qui' qui' l-le. A'hua berixie ca me'ya qui' canu ritsila bél-liuá nna bèthitinnianie bel-liu qui' ca niá loyu. <sup>16</sup>Ra tìe canu rutti' cã becha: Lícua ca nui nì nna, aláa yú'u làti cca í'yya lá guni le litsi' Tata qui'a. <sup>17</sup>Làniana bexa latsi' ca discípulo qui'áa làti ga'na escrito nna ra:

De tántuani amor té quia' por litsi' cuiã'lu' nna,  
Labí dejar gunia' qui'ni  
bìcca'áya guni cã nì.

<sup>18</sup>Làniana gunne tè ca judúa nna ra cã ne: Biani milagru ni ccani lu' guni lu' para ilá'ni tu', prueba de qui'ni té derecho qui' lu' de ÿiabara' acca runi lu' ca così. <sup>19</sup>Becàbi Jesús nna rèe cã: Líutappa' templu'ij nna làniana le' tsunna ubitsa teruba,

elítha ya' a. <sup>20</sup>Ra tè ca judúa ne: Le' chua' xùppa ida gutsé'e cabi beni cabi templu'ij, atsi'íni lu' nna da' tè lu' ína lu' qui'ni le' tsunna ubitsa teruba elítha lu' a. <sup>21</sup>Pero templo nu beni Jesús tratar nna, la'a nu cca qui' cuerpo qui'áa bá nuá rèe anía. <sup>22</sup>Acca, loti' beyáthee bitsa tsunnáa de lo lù'uti nna, bexalatsi' ca discípulo qui'áa qui'ni rèe nui nna huíalatsi' cabi nu ra lo Escritura a'hua ca titsa' nu gunènie cabi.

<sup>23</sup>Loti' gù'l-la' fiesta nu láa pascua nna, chi re' Jesús le' Jerusalén. I'yetse' ca enne' de bila'ni cã ca milagro nu beni áa nna huíalatsi' qui' qui'ni née Cristua. <sup>24</sup>Pero Jesús nna labí confianza gá gùppee cã, porqui'ni hua nabia' bánie iyaba cã. <sup>25</sup>Nìhua labí necesidad gùdue qui'ni nu'ya quixá'aniã ne nu cca qui' ca enne'; pues la'a mísmuba lèe nna hua yù bée tì'i'ya ná la' rulábalatsi' qui' ttu ttu tsa qui'.

**3** Gùdua ttu nubeyu' láa Nicodemo, denúã religión fariseo. Lã nna uccuã ttu enne' principal de lo iyaba ca enne' judúa. <sup>2</sup>Nicodémua nna huíã de réla lá ru'a lo Jesús nna rã ne: Maestro, yù tu' qui'ni Tata Dios nna guthel-le'e cuiã'lu' para gulue'ni cuiã'lu' intu' enseñanza, porqui'ni lanú nu'ya ccani guni ca milagro luetsi canu runi cuiã'lu' canchu lanú Tata Dios runie na cualani. <sup>3</sup>Becàbi Jesús nna rèe na: Hualigani te' nia' lu': Nu'ya díbá ttu enne' canchu labí galiã attu nna, entonces nunca labí ilá'niã tì'i'ya tsè' ná la' rigú'ubia' qui' Tata Dios. <sup>4</sup>Nicodémua nna rã ne: Tì'ani modo galia ttu enne' attu de chi

ná enne' gula nì'i. Tsí huacca éya'a attu vuelta le' nàna qui'lì para galià attu cá. <sup>5</sup>Becàbi Jesús nna rèe na: Hualigani te' nia' lu': Nu labí galià de inda nna Espíritu nna, entonces nunca labí gá'a le' reino qui' Tata Dios. <sup>6</sup>Canu nàlia por medio de enne' ba nna, pues cuerpo material bá ná ca, pero canu nàlia por la'huacca qui' Espíritu Santo nna, làcà nna ná ca enne' espiritual. <sup>7</sup>Acca bittu ca'yílati' lu' qui'ni pá'a' lu': Iyaba le nna náduel'la' galia le attu. <sup>8</sup>Por ejemplo: be' nna ga'ya tediba rittià nna riyeni terúbáni lu' tsi'lì, pero labí yù lu' ga'ya la dá'a nìhua ga'ya la díq nna. A'ba ná iyaba canu nàlia por la'huacca qui' Espíritu Santo, labí ritelíni ca ti'iyà la modo ràlia ca attu. <sup>9</sup>Becàbi Nicodémua nna rā ne: Ti'ani modo ccá nui cá. <sup>10</sup>Becàbi Jesús nna rèe na: Maestro nua' ná lu' qui' ca enne' Israel nna, tsí bihua nabia'ni lu' ca così cá. <sup>11</sup>Hualigani te' nia' lu': Nu yù ri'u nna, lànuá rinne ri'u. Nu chi bila'ni ri'u nna, lànuá ribèqquiali ri'u. Pero lebi'i nna labí ríalatsi' le nu riquixá'a tu'. <sup>12</sup>Chi gutixa'ánia' le ca cosa fácil qui' yetsiloyu ba, pero labí ríalatsi' le. Ti'ala modo tsíalatsi' le canchu quixa'ánia' le ca cosa qui' yíabara' cá. <sup>13</sup>Lanu' nu'ya chi huàppi yíabara', sino Enne' huàdi lá de yíabara' nna née Nubeyu' de Yíabara'; lèe nna dúe yíabara'. <sup>14</sup>Ti'ba Moisés betaá' bi ttu bèl'là nu de metal lo ttu yà nna guchitha bi a rá' loti' tsè'e cabi le' desiértua; a'hua caduel'la' qui'ni Nubeyu' de Yíabara' nna ichitha ca ne lo ttu yà, <sup>15</sup>para qui'ni iyaba canu tsíalatsi' qui' ne nna labí nitti

ca sino qui'ni gata' la'labàni nu labí ttíq qui' qui'. <sup>16</sup>Porqui'ni yala telá catsi'íni Tata Dios ca enne' tsè'e yétsiloyu, acca guthèl'le'e ttu teruba Yí'ni áa, para qui'ni nu'ya tediba tsíalatsi' ne nna labí nittià, sino qui'ni gata' la'labàni nu labí ttíq qui'lì. <sup>17</sup>Porqui'ni Tata Dios nna labí guthèl'le'e Yí'ni áa para gunie condenar yétsiloyu, sino para qui'ni yétsiloyu nna ccá lā salvo por lèe. <sup>18</sup>Nu ríalatsi' Yí'ni Tata Dios nna labí té castigo qui'lì; pero nu labí ríalatsi' ne nna, chi ná destinado para ccá castigar porqui'ni labí nì'i tsíalatsi' tùteruba enne' ná Yí'ni Tata Dios. <sup>19</sup>Nui nna ná razón de qui'ni hua té condenación: qui'ni gul'lanì la'yáni'a yétsiloyu, pero ca enne' nna adila guyú'u latsi' qui' la'chul:a ti'chula la'yani', porqui'ni yala tul:la' beni ca. <sup>20</sup>Iyaba ca enne' canu runi mal nna labí cca guyu ca la'yani', nidi làa ribiga' ca le' la'yani', para qui'ni làa ilá'ló iyaba ca mal nu runi ca. <sup>21</sup>Pero ca enne' canu runi ba de acuerdo lani nu ná lí nna, pues làcà nna ribiga' ca le' la'yani', para qui'ni ilá'ní qui'ni ca obra qui' qui' nna ná ca de acuerdo ba lani voluntad qui' Tata Dios.

<sup>22</sup>Guttè díbá nuá nna huía Jesús lani ca discípulo qui'áa para región qui' Judea. Níabá nna gutsè'e cabi tuchùppa ubitsa huèni ca enne' bautizar. <sup>23</sup>Juáan nna beni huá bi bautizar, ttu lugar láq Enón cuitta' taá attu lugar láq Salim, porqui'ni i'yenitsè' inda yù'u nía. Ca enne' nna huía tè ca uccua ca bautizar. <sup>24</sup>Nui nna uccua ántesca gudàl:la ca Juáan litsi' iyyà. <sup>25</sup>Làniana ca discípulo qui' Juáan nna beni cabi

discutir lani ca judíua acerca de ca costumbre qui' qui' para eyacca nàrini ca. <sup>26</sup>Huía tè ca ru'a lo Juáan nna ra ca bi: Maestro, tsí hua yù cuià'lu' qui'ni enne' du lani lu' biya tsá nuá attu lado yò Jordán nna, gutixa'a huá lu' nu cca qui'e, pues annana ría iyaba ca enne' ru'a lo bi nna runi huá bi ca bautizar.

<sup>27</sup>Làniana Juáan nna ra bi ca: Ttu enne' nna, labí biya runia recibir canchu làhuabi nà por voluntad qui' Tata Dios. <sup>28</sup>La'a mísmuba lebi'i chi biyénini le loti' nia': Álahua inte' nuá Cristo, sino qui'ni huenitsàna teruba ná' nna guthèl'le'e yà'la inte'. <sup>29</sup>Le' ttu thá'a nna du ènne'yu' nu ná novio lani novia qui' bi. Amigo qui' nóvioá nna du bā cuitta' bi nna rudà nàgui'i rinne bi nna yala redacca'niā. A'hua inte' annana yala la' redacca' latsi' chi té quia' de riyeni te' rinnie. <sup>30</sup>Lèe nna caduel'la' quée adiru enne' yēni le' yétsiloyu'i; pero inte' nna eyàttsi' lá la' dāliani quia'.

<sup>31</sup>Enne' da' de yīabara' nna adiru dàqqe'e de lo iyábani; pero nu da' ba de yétsiloyu nna, nu yétsiloyu ba nā a'hua nu cca qui' yétsiloyu ba rinnie nna. Pero Enne' da' de yīabara' nna née enne' bāna'ni iyábani. <sup>32</sup>Lèe nna riquixé'e nu bila'nie nna nu biyéninie nna, pero lanú nuya rudà nàgui'i nu riquixé'e. <sup>33</sup>Pero nu ríalatsi' nu riquixé'e nna, lànua nna runia reconocer qui'ni Dios nna siempre rinnie nu ná lí. <sup>34</sup>Porqui'ni Enne' guthel'la' Tata Dios nna, pues ca titsa' qui' Tata Dios ba rinnie, porqui'ni aláa lani medida ba betie la'huacca qui' Espíritu Santo lanie, sino

itute. <sup>35</sup>Tàtaa nna catsi'ínie Yī'ni áa. Iyábani ca cosa nna chi betie ca latsi' né'e. <sup>36</sup>Nu hualigani ríalatsi'i qui' Yī'ni áa nna, chi té la'labàni nu labí ttíā qui'i. Pero nu labí ríalatsi'i qui' Yī'ni áa nna, entonces labí gata' la'labàni qui'i, sino qui'ni castigo qui' Tata Dios nna seguru bá il'lania lani a.

**4** Guteli bani Señor qui'ni ca fariséua nna chi bina ca qui'ni lèe nna adila iyé ca discípulo qui'e chi ná a'hua adila ca enne' runie bautizar tì'chula Juáan, <sup>2</sup>màsqui'ba álahua Jesús tè beni bautizar, sino ca discípulo qui'áa bá. <sup>3</sup>De uccue saber nui nna, acca beria tìe le' región qui' Judea nna hué attu vuelta para Galilea. <sup>4</sup>Para etsine'e nía nna uccua duel'la' ttíèe néda nu día para Samaria. <sup>5</sup>Bitsina' tìe le' ttu yetsi to' láā Sicar le' región qui' Samaria, ru'a loyu qui' tà' Jacob nu beda' latsi' bi bete bi qui' yī'ni bi José enne' gùdua tiempo antigua. <sup>6</sup>Nía nna re' ttu pozo inda nu gulèqquia ta' Jacob. Jesús nna de tántua reyàtsanie yu'ée néda nna, acca gure' tenie bedi' latsi'e ru'a pózua. Ttú tsì'nu hora ti'gá nuá. <sup>7</sup>Làniana bitsina' ttu niula enne' Samaria díā guyi' inda ru'a pózua. Jesús nna ra tìe na: Benna tí' inda i'ya'. <sup>8</sup>Ca discípulo qui'áa nna día cabi le' yétsiá hu'i nu go cabi. <sup>9</sup>Niula samaritánaá nna rā ne: Ti'ani modo acca rinàbani lu' inte' inda, yà'ni qui'ni ná lu' enne' judío, inte' nna niula samaritana nì'i. Anía ra niuláa porqui'ni ca enne' judío nna canu samaritano nna labí cca guyu luetsi qui'. <sup>10</sup>Becàbi Jesús nna rèe na: Cálá nabia' tsàni

lu' nu yá rúnna ba Tata Dios a'hua nuŷa ènni'ì nua' rèe lu': Bèna tí' inda i'ya'; pues lu' lá inàbani lu' e inda, lèe nna gúnnee inda bàni tegánì qui' lu'. <sup>11</sup>Niuláa nna ra tià ne: Señor, labí biŷa dèni lu' para cueqquia lu' indì, a'hua pozui nna itéttia tsè' ri'a. Gala taxi' lu' inda bàni para gunna lu' quia' cá. <sup>12</sup>Tsí ína ri'u adila enne' ŷeni ná lu' tì'chula ta' tàta qui' tu' Jacob enne' gulèqquia pozui nna bethà'na bi a' lani intu' cá. Nì bá gù'ya bi inda, a'hua ca ŷi'ni bi nna ca gù'na bia' qui' bi nna. <sup>13</sup>Becàbi Jesús nna rèe na: Nuŷa tèdiba í'ya' inda nu da' le' pozui nna, ibìtsi bá attu, <sup>14</sup>pero nu í'ya' inda nu gutía' qui'ì nna, para siempre labiru ibìtsia; sino qui'ni inda gutía' qui'ì nna ccá lã lo lòstu'ì tì'a ru'a ttu chorro làti ril'ani tì'tini inda para la'labàni nu labí ttíà qui'ì. <sup>15</sup>Niuláa nna ra tià ne: Señor, benna cuià'lu' indà' quia', para qui'ni bíttúru ibìtsia' ñihua làa ìta rù'a' nì guŷi' inda nna. <sup>16</sup>Jesús nna rèe na: Beyya tal'luítsa' tsèla lu'a nna, ìta tè lu' nì gunna' indì qui' le. <sup>17</sup>Becàbi niuláa nna ra: Lanú tsèlàa' té. Jesús nna ra tìe na: Hualibani lu' lanú tsèla lu' té. <sup>18</sup>Porqui'ni gayu' tsèla lu' chi gutsé'e, pero nu dualàni lu' annana labí nã tsèla lu', acca hualibani lu' nu ra lu'. <sup>19</sup>Niuláa nna ra tià ne: Señor, tì' cca te' nna ná cuià'lu' enne' rinne parte Tata Dios. <sup>20</sup>Ca ta' tàta qui' tu'a nna beni cabi adorar Tata Dios lo i'ya' dua nì, pero lebi'ì nna rena le qui'ni le' Jerusalén teruba ná qui'ni tsía ca enne' huèni e adorar. <sup>21</sup>Jesús nna ra tìe na: Niula, huíalatsi' lu' quia', qui'ni huà'l'ani

tsá canchu chi ñihua lo í'yì ñihua le' Jerusalén nna guni le Tata Dios adorar. <sup>22</sup>Lebi'ì ca enne' samaritano nna yala adorar runi le, pero labí nabia'ni le Tata Dios. Intu' ca enne' de raza judío nna runi tu' e adorar nna nabia'ni tu' e porqui'ni enne' gunna salvación nna dé'e entre ca enne' judío. <sup>23</sup>Pero huà'l'ani tsá nna, a'hua chi gù'l'la' hora qui'ni canu hualigani calatsi' qui' guni ca Tata Dios adorar, pues guni ca ne adorar lani itute espíritu qui' qui' nna de acuerdo ba lani nu ná lí nna. Porqui'ni Tata Dios nna reyílèe ca enne' luetsi ca nua' para guni ca ne adorar. <sup>24</sup>Dios nna labí née biŷa cosa material qui' yétsiloyu'; acca canu calatsi' qui' guni ca ne adorar nna, ná qui'ni guni ca ne adorar lani espíritu qui' qui' nna de acuerdo ba lani nu ná lí. <sup>25</sup>Niuláa nna ra ne: Yúá' qui'ni huà'l'ani Cristo enne' ribèda tu' qui'ni itéè para gudilèe intu', canchu chi íl'lanie nna quixá'anie intu' claru taá iyábani ca cosa. <sup>26</sup>Jesús nna ra tìe na: Inte' Cristo rui'a' lani lu' titsa'. <sup>27</sup>Làniana betsina' tè ca discípulo qui'áa nna uccuaŷí bá latsi' cabi qui'ni rui'e titsa' lani ttu niula samaritana. Atsi'íni ni ttú cabi labí beyáyani cabi inàba titsa' cabi e ína cabi: Biani nua' calatsi' niulã', o biani titsa' ní nua' rue' cuià'lu' lani a'. <sup>28</sup>Làniana bethà'na niuláa ré'è qui' niá nna deyya' le' yétsiá taquixá'aniá ca enne' nna ra ca: <sup>29</sup>Lítaáruhuá' inna' le ttu ènne'yu' chi rèe inte' iyaba nu chi benia'. Xiaba canchu lèe ènni'a' Cristua enne' ribèda ri'u. <sup>30</sup>Ca ènni'a nna biria tè ca le' yétsiá nna



gùdulo cã huía cã làti du Jesús.

<sup>31</sup>Pero miéntraste nna ca discípulo qui'áa nna gutta'yúni cabi e nna ra cabi e: Maestro, gutò tí' cuiã'lu'. <sup>32</sup>Lèe nna rèe cabi: Té bá ttu la'gò quia' gúá'; lebi'i nna labí yù le biã nua'. <sup>33</sup>Làniana ca discípulúa nna ra luetsi cabi: Tsi aláa nuã chi tahua' nu gúe. <sup>34</sup>Jesús nna rèe cabi: La'gò quia' nna ná qui'ni guni ba' voluntad qui' enne' guthèl-le'e inte' nna gul-lúya'a' nu rèe gunia' nna. <sup>35</sup>Tsí álahua rena le qui'ni hua reyãtsaáru atãppa biú' para eãyu' lena' cá. Pero inte' nna nia' le: Linna'áruhuá qui'ni chi da' attu cosecha huaya', chi ná listo para eãy'ã. <sup>36</sup>Enne' yù'u tsina huetùppa cosecha nna ridi' huá laã bi lena', pero lena' nu rutùppa bíá nna ná lã para la'labàni tulidàni, para qui'ni enne' rada nna edacca' huáni bi tì'ba enne' redi' coséchaá. <sup>37</sup>Anía nna cca cumplir ttu dicho ra: Ttu enne' huaya' rada, pero attu enne' huaya' rutùppa lena'. <sup>38</sup>Inte' nna chi guthèl-la'a' le para édi' le cosecha làti álahua lebi'i gùda, sino ca enne' huaya' ba beni tsina; lebi'i nna bitsina' tè le huetùppa cosecha.

<sup>39</sup>Ïyetse' ca enne' le' yetsi Samaria huíalatsi' qui' qui'ni Jesús ènni'ã' Cristua por ca titsa' qui' niuláa, porqui'ni betiã testimonio nna ra: Chi gutixa'ánie inte' iyaba nu chi benia'. <sup>40</sup>Bitsina' tè ca enne' Samaria ru'a lúe nna gutta'yúni cã ne qui'ni cuédée tuchùppa ubitsa lani cã. Acca gulèda tie nía chuppa ubitsa. <sup>41</sup>Nuyétse'éru ca enne' huíalatsi' qui' de rudà naga' qui' qui'e. <sup>42</sup>Làniana ra tè cã niuláa: Annana chi ríalatsi' tu', álaáruhá

por ca titsa' nu chi ra lu' intu', sino porqui'ni la'a mísmubani intu' nna chi biyénini tu' titsa' qui'e nna chi yù tu' qui'ni ènni'ã' nna hualigani née Cristo Salvador qui' itute yétsiloyu.

<sup>43</sup>Gutè díbã chuppa ubitsa nna beria Jesús nía nna hué Galilea, pero aláa hasta látsie Nazaret, <sup>44</sup>porqui'ni la'a labée nna gutixè'e qui'ni labí ruyu tsè' ca enne' ttu profeta nu látsi qui'. <sup>45</sup>Bitsina' bée Galilea nna, ca enne' galiléua nna tsè'ba beni cã ne recibir porqui'ni chi bila'ni cã iyaba nu benie le' Jerusalén loti' gùl-la' fiéstaá, porqui'ni huía huá cã nía lànìa. <sup>46</sup>Làniana huía Jesús attu vuelta yetsi Caná le' región qui' Galilea làti benie qui'ni indaá nna uccuã vino. Le' yetsi Capernaum nna gùdua ttu nubeyu' uccuã capitán le' palacio qui' rey. Nu ná capitán nna gùdua ttu ãi'ni beyu'ã yala fuerte huè'niã. <sup>47</sup>Bina bá qui'ni Jesús nna bitsine'e Galilea dé'e Judéa lá nna, acca huía tiã ru'a lúe nna gutta'yúniã ne qui'ni tsíe eyúniie ãi'ni niá, porqui'ni lo lù'uti taá chi tiã. <sup>48</sup>Làniana ra tè Jesús na: Canchu bihua ilá'ni le ca milagro o biã prueba de la'huacca nu dacca' iquíla'ní latsi' le nna, entonces bihua tsíalatsi' le. <sup>49</sup>Becàbi nu ná capitán nna ra ne: Señor, gutà xiã bál-la cuiã'lu' ántesca gatti ãi'ni ya'a. <sup>50</sup>Jesús nna rèe na: Beyya ba, ãi'ni to' qui' lu'a nna huaccabàni bá. Nubeyu'a nna huía tàa latsi'ã titsa' nu ra Jesús na, deyya tiã. <sup>51</sup>Néda ba deyu'ã nna, tattsã' ca mozo qui' niá na nna bete cã noticia tsè' lani ã nna ra cã: ãi'ni cuiã'lu'a nna



chi beyacca latsi'i. <sup>52</sup>Gunàba titsa' taá çà biya hora gùdulo beyacca latsi'i. Ra tè çà na: Ritì ttu tì'ga nàyaá nna beria yì'l-láa. <sup>53</sup>Làniana gutelíni tàta qui' nubeyu' cuìti' rà'nìa qui'ni méruáni hóraá nuá ra Jesús na: Yì'ni to' qui' lu'a nna bàni bá. Làniana adila huíalatsi'i Jesús, a'hua iyaba canu tsè'e le' litsi'i nna huía huá latsi' qui' qui'ni née Cristo. <sup>54</sup>Milágruì nna beni Jesús loti' gude'e le' región láq Judea nna huíe para Galilea. Nui nna uccua chuppa prueba nu benie nna belue'ní qui'ni té la'huacca quì'e de yiabara'.

**5** Gutè díbá nuá nna huía Jesús Jerusalén loti' gùl-la' ttu fiesta qui' ca judíua. <sup>2</sup>Ru'a ciudadad èxabá làti du ttu puerta rittè ca carnéruá nna, re' ttu tanque nu láq lani titsa' hebreo Betesda. Ita'lùba tánqueá nna dàa gayu' corredor. <sup>3</sup>Nía nna anta' nuýé tsè'ni canu ra'ni; ca ciego l-le ca cojo l-le, ca paralítico l-le, ribeda çà qui'ni echìxi luetsi indaá. <sup>4</sup>Porqui'ni ttu ángel nna hua ràdi yégáabá bi làti re' tánqueá ruchixi bi luetsi indaá. Nù'yadiba radi yà'la tè le' tánqueá bitola de bechixi luetsi indaá nna, reyacca taá latsi'i de biya tediba itsahue' ní ra'niá. <sup>5</sup>Nía nna re' ttu nubeyu' chi uccua tsiyúnu' érua' ida ra'niá. <sup>6</sup>Bilá' bání Jesús na tiq nía nna, gutelí taánie qui'ni chi gutsá ridácca'a anía, acca rèe na: Tsí hua calatsi' lu' eyacca latsi' lu'. <sup>7</sup>Becàbi nu rà'nìa nna rã ne: Làchu Señor, pero lanú té quia' nuya gúga'a inte' le' tánquì canchu chi rechixi luetsi indì; porqui'ni dácá' telá ribíga'a' nna, pues attu nu huaya' lá nna ra'a chilá antes de inte'. <sup>8</sup>Jesús

nna rèe na: Beyátha nna, bedi' tá'à qui' lu'a' nna gùdà'. <sup>9</sup>Luégu taání nna beyacca chì latsi' nubéyu'a nna, betètsi tiq tá'à qui' niá nna benìtta'a nna deyya tiq. <sup>10</sup>Làniana ca judíua nna ra çà nu beyacca latsi' niá: Labí ná qui'ni éyua' lu' tá'à qui' lu'a' qui'ni hua ná tsá redi' latsi' ri'lu. <sup>11</sup>Becàbiã nna rã çà: Enne' beyunie inte' nna, la'a labée nna rèe inte': Bedi' tá'à qui' lu'a' nna gùdà'. <sup>12</sup>Gunàba titsa' tè çà nna ra çà: Núnì nuq' rã lu' a'. <sup>13</sup>Nu beyacca latsi' niá nna labí yùq nuya ènni'a beyunie na acca reda'a, porqui'ni iyètse'ni ca enne' tsè'e nía, a'hua Jesús nna lanúrue té nía porqui'ni chi díe attu làti huaya'. <sup>14</sup>Bitola nna bila'ni Jesús nubéyu'a le' templua nna ra tiè na: Annana chi beyacca latsi' lu', acca bíttuúru guni lu' tul-la', para qui'ni làa thacca' lu' biya attu cosa peor. <sup>15</sup>Deyya tè nubéyu'a nna gutixa'ániã ca judíua qui'ni Jesús bá ènni'a beyunie na. <sup>16</sup>Canu rigú'ubia' qui' ca judíua nna gùdulo çà betsia latsi' qui' Jesús nna uccua latsi' qui' gúttí çà ne, porqui'ni beyunie ca enne' rà'nìa tsá yèni qui' qui'. <sup>17</sup>Jesús nna rèe çà: Tàta quí'a nna tulidàba runie tsina, acca a'hua inte' nna runi huá' tsina ttu ttu tsá taání. <sup>18</sup>Por ca titsa'a nna adila bitsia latsi' ca judíua nna uccua latsi' qui' gúttí çà ne. Porqui'ni álaáruhá qui'ni làa gútueé tsá labí ná qui'ni guni çà tsina, sino porqui'ni rèe qui'ni Dios nna née propio gani Tàta quì'e, ti'batsi né tulappa lani Tata Dios.

<sup>19</sup>Làniana becàbi Jesús nna rèe çà: Hualigani te' nia' le: Labí biya ccani Yì'ni Tata Dios gunie por

la' calatsi' qui' bée, sino nu rilá' bánie runi Tata Dios a'hua runie, porqui'ni iyaba nu runi Tatáa nna, aníahuá runi Ýi'ni áa. <sup>20</sup>Porqui'ni Tatáa na yala catsi'ínie Ýi'ni áa, a'hua ruluè'nie Ýi'ni áa iyábani ca cosa nu runie. Pero adírulá ca cosa de la'huacca ýeni gulue'nie ne, hàstaá qui'ni lebi'i nna iquíla'ní latsi' le. <sup>21</sup>Porqui'ni tì'ba Tatáa rechìthee canu yatti nna rutie la'labàni qui' qui, pues a'hua Ýi'ni áa nna rute huée la'labàni qui' canu càba latsi'e. <sup>22</sup>Porqui'ni Tatáa nna lanú nuýa runie juzgar, sino qui'ni latsi' ná' Ýi'ni áa bá nna chi betie itute derecho para cueqqie sentencia qui' ca enne'. <sup>23</sup>Anía beni Tatáa para qui'ni iyaba ca enne' nna gudàliani cā Ýi'ni áa tì'ba rudàliani cā Tatáa. Nuýa tediba labí rudàlianiā Ýi'ni áa nna, ñihua Tatáa labí rudàlianiā, porqui'ni làbe nna guthèl-le'e enne' ná Ýi'ni áa. <sup>24</sup>Hualigani te' nia' le: Nuýa tediba riyéniniā titsa' quíyi'i nna ríalatsi'i Enne' guthèl-le'e inte' nna, chi té la'labàni nu labí ttíā quì'i; a'hua labí da' juicio quì'i, sino chi gulàā de lo lù'uti nna bàniā. <sup>25</sup>Hualigani te' nia' le: Huàllani tsá nna, chi gùlla' hora qui'ni canu yatti nna iyénini cā tsì'i Ýi'ni Tata Dios. Canu iyénini cā qui'e nna ccabàni cā. <sup>26</sup>Porqui'ni tì'a Tatáa nna bànie por la'huacca qui' la'a labée, pues a'hua chi betie qui' Ýi'ni áa la'a mísmuba la'huacca para gunie disponer qui' la'a la'labàni qui'bé. <sup>27</sup>A'hua betie latsi' né'e derecho para cueqqie sentencia qui' ca enne', yà'nì qui'ni née Nubeyu' de Ýiabara'. <sup>28</sup>Bittu ccaýí latsi' le por

nui; porqui'ni huàllani tsá canchu chi iyábani canu anta' le' yerubà nna iyénini cā tsì'e. <sup>29</sup>Canu beni nu ná tsè' nna, eyátha cā de lo lù'uti para la'labània; canu beni mal nna eyátha huá cā, pero para condenación.

<sup>30</sup>Labí cca te' biýa gunia' por nu cca quíba'; sino runia' juzgar según nu rinèni Tatáa inte', a'hua lù'uxticia quia' nna hua nā según nu ná lí, porqui'ni labí rudúa iquia' gunia' nu càba látsa'a', sino qui'ni runia' según bá tì' rú'ulatsi' Tatáa enne' guthèl-le'e inte'. <sup>31</sup>Porqui'ni inte' nna riquixá'a' nu cca quíba', acca rena le qui'ni nu riquixa'a' nna labí nā nu lí. <sup>32</sup>Pero hua dua attu enne' riquixe'e nu cca quia', inte' nna yúá' qui'ni nu riquixe'e acerca de inte' nna nā lígani. <sup>33</sup>Lebi'i nna guthel-la' le ca enne' qui' le ru'a lo Juáan para inàba titsa' cā bi acerca de inte'. Làbi nna nu lí taá gutixa'a bi. <sup>34</sup>Álahua porqui'ni riquina' te' qui'ni nuýa ttu enne' le' yétsiloyuì quixa'ā a favor de inte' para ccá' valer, sino ruréxa'a' latsi' le acerca de Juáan para qui'ni tsíalatsi' le nu gutixa'a bi nna l-lá le. <sup>35</sup>Ca titsa' nu gutixa'a bi nna uccua cā tì'a la'yani' nu runna ttu lámpara. Lebi'i nna guyú'u bá latsi' le gudà naga' le qui' bi, pero por ttu tsàstito' teruba. <sup>36</sup>Pero inte' nna ccá huá' valer por ca obra nu beni Tatáa inte' mandado gunia'; la'a mísmuba ca obra nu runia' nna runna cā testimonio nu cca quia' lani adiru la'huacca tì'chu ca titsa' nu gutixa'a Juáan acerca de inte', prueba de qui'ni Tatáa nna guthèl-le'e inte'. <sup>37</sup>A'hua Tatáa

enne' guthèl-le'e inte' nna, chi betie testimonio acerca de inte'. Lebi'i nna nunca labí chi biyé'nini le tsì'e, nìhua nì' ilá'ni le la' rinna' quì'e nna, <sup>38</sup>nìhua titsa' quì'e labí té lo losto' le, porqui'ni lebi'i nna labí ríalatsi' le enne' guthèl-le'e. <sup>39</sup>Lebi'i nna lani cuidado tsè' hua rùl-là ba le Escritura porqui'ni calatsi' le gata' la'labàni nu labí ttíq' qui' le. Atsi'íni màsqwi'ba retseláni le làti riquixá'a nu cca quia', <sup>40</sup>pero labí calatsi' le ibiga' le tsíalatsi' le inte' para qui'ni gata' la'labàni nu labí ttíq' qui' le. <sup>41</sup>Bihua reyila' la' rudàliani qui' ca enne'. <sup>42</sup>Pero inte' nna, hua nabia' ba te' ti'iya ná le, porqui'ni labí té la' tsì'ilatsi' qui' le lani Tata Dios lo losto' le. <sup>43</sup>Inte' nna daya' por mandado qui' Tata quíya'á, atsi'íni bihua ríalatsi' le quia'. Pero canchu íl-lani attu nuhuaya' por la' calatsi' qui'bíi nna entonces qui' nuá lá tsíalatsi' le cá. <sup>44</sup>Ti'ani modo gappa le fe, pues la'a lebi'i ba nna rú'ulatsi' le gudàliani luetsi le, pero rudu lá le ttu lado la' dàliani nu da' qui' tùteruba Tata Dios. <sup>45</sup>Bittu ccani le qui'ni inte' nna ínní'a' contra le ru'a lo Tatáa. Pues dua ba enne' rutsia falta qui' le; la'a mísmuba Moisés enne' ríalatsi' le nna, pues la'a labé nna rinne bi contra lebi'i. <sup>46</sup>Cáalá hualigani ríalatsi' le qui' Moisés nna, huiyya huá latsi' le quia'; porqui'ni nu cca quíba' bedia bi. <sup>47</sup>Pero canchu bihua ríalatsi' le ca titsa' nu bedia bi nna, ti'ala modo tsíalatsi' le ca titsa' quíyi'j cá.

**6** Bitola de nuá nna, huía Jesús attu ladu indatò' qui' Galilea nu lá huá Tiberias. <sup>2</sup>Enne' yétse'ní tanò' çà ne, porqui'ni bila'ni çà ca

milagro nu benie de beyunie canu ra'ni. <sup>3</sup>Là'niana huàppi Jesús lo ttu i'ya. Nía nna gurè'nie lani ca discípulo qui'áa. <sup>4</sup>Chì' taá debiga' tsá pascua, fiesta qui' ca enne' judíua. <sup>5</sup>Gunna' Jesús nna bila'nie qui'ni enne' yétse'ní dia làti ri'áa, acca ratie Felipee: Gani gó'o ri'u ettaxtila para go iyaba ca ènni'j cá. <sup>6</sup>Pero aláa porqui'ni labí yùe ti'iya gunie acca rèe anía, sino para guni bée Felipea prueba. <sup>7</sup>Becàbi Felipea nna ra bi e: Lani chuppa gayua' denario nna, labí ccání para gó'o ri'u ettaxtíla nna hué' ri'u ttu tsa ca ènni'j ti'tó' tsàto'. <sup>8</sup>Attu discípulo qui' Jesús, lá bi Andrés bettsi' Simón Pedrua nna, ra bi e: <sup>9</sup>Nì du ttu nubeyu' cuiti' dènià gayu' ettaxtíla cebada, chuppa bél-la to' nna, pero biani gúnini ri'u nui lani ca enne' yétse'ní nì'i. <sup>10</sup>Jesús nna ra tìe: Ligatsi ca ènni'q' qui'ni xúaní çà. Anía rèe porqui'ni yala tacca' té nía nna, guỹua tení ca gayu' mili' tì'ga ca nubeyu' lo tácca'á. <sup>11</sup>Là'niana guỹi' Jesús ca ettaxtílaá nna gunàbèe bendición lani Tata Dios, bete tìe lani ca discípuluá. Làcabi nna gutithia cabi lani ca enne' yuàní lo tácca'á. Anía tehuá gutithie ca bél-la nna. Gutò iyaba ca ènni'a tì'i'yaba ùccuàni qui' quj. <sup>12</sup>De beyacca gutò çà nna, là'niana ra Jesús ca discípuluá: Liutùppa ca pedazo nu bexa para qui'ni bíttu tehuá biya cátittia. <sup>13</sup>Bedi' tè cabi ca pedazo nu bèxani ca ènni'a nna beditsà' cabi tsì'nu tsùmmithú de lo gayu' ca ettaxtílaá. <sup>14</sup>Bilá'báni ca enne' yétsi'á milagro nu beni Jesús, accana ra çà: Hualigani ènni'j

ènni'á' profeta enne' ná qui'ni ìta yétsiloyu, porqui'ni té la'huacca de ÿiabara' qui'e. <sup>15</sup>Gutelí báni Jesús qui'ni ca enne' nna uccua latsi' qui gudàxu' ca ne a la fuerza taá para guni ca ne rey; acca bede'e nía nna hué attu lo i'ya la ttu terúbée.

<sup>16</sup>Uccua bá yèlà nna beyàdi ca discípulo qui'áa lo í'yaá nna bitsina' cabi ru'a indatù'a. <sup>17</sup>Gutà'a tè cabi le' ttu barco nna, dia cabi rittè cabi lo indatù'a para itsina' cabi Capernaum. Chi gùl'la nna atsi'íni lanú Jesús nì'i etsina' lani cabi.

<sup>18</sup>Làniana huàtha ttu be' fuérteni nna, ridúlini lo indatù'a uccua.

<sup>19</sup>Ttu legua tì'gá chi guda' cabi lo indaá nna, de bila'ni cabi Jesús ride'e lo indatù'a díe para taýenie barco nu yù'u cabía nna, yàlani gutsini cabi. <sup>20</sup>Pero lèe nna rèe cabi: Inte' ba nui, bittu gátsini le.

<sup>21</sup>Làcabi nna yala lani la' redácca' latsi' beni cabi e recibir le' bárca. Bárca nna luégutaá bitsina'á ru'a loyu làti dia cabía. <sup>22</sup>Attu yu'utsá nna ca enne' tsè'erù attu lado la indatù'a nna bexa latsi' qui' qui'ni lanuru attu barco du ru'a indaá, sino tùteruba barco to'. Hua yù bá ca qui'ni Jesús nna labí guté'e le' barcu tú'a lani ca discípulú, sino qui'ni tsua' làteruba cabi deyya.

<sup>23</sup>Pero adí ca barco da' de Tiberias nna dàa ca èxaba làti gutò cabi ettaxtílaá bitola de gunàba Señor bendición. <sup>24</sup>Ca ènni'a nna bila'ni ca qui'ni lanú Jesús té nía nìhua ca discípulú nna, acca gutà'a ca le' ca bárca nna huía ca attu lado la para Capernaum tatila ca Jesús.

<sup>25</sup>Betselá báni ca ne attu lado la indatù'a nna, ra ca ne: Maestro,

cuanì gul'lanì cuià'lu' nì. <sup>26</sup>Becàbi Jesús nna rèe ca: Hualigani te' nia' le qui'ni reyìla le inte', álahua por ca obra de la'huacca nu chi bila'ni le benia', sino porqui'ni bià'cua báni qui' le gutò le ettaxtílaá.

<sup>27</sup>Ligúni tsina, aláa por la'gò nu retu bá, sino por la'gò nu guchia nna gunna la'labani nu labí ttíá qui' le, nu gunna Nubeyu' de ÿiabara' qui' le, porqui'ni lani labé chi bete Tata Dios la'huacca qui'e para gunie na.

<sup>28</sup>Làniana ra ca ne: Biani dani tu' guni tu' para ccá cumplir según nu rú'ulatsi' Tata Dios cá. <sup>29</sup>Becàbi Jesús nna rèe ca: Voluntad qui' Tata Dios nna ná íj: ná qui'ni tsíalatsi' le qui' enne' guthèl'le'e. <sup>30</sup>Ra tè ca ne: Tì'ani modo tsíalatsi' tu' qui' lu' nì'i. Tsí guni lu' ttu prueba de la'huacca para ilá'ni tu' qui'ni té la'huacca qui' lu' de ÿiabara' nna tsíalatsi' tu'.

<sup>31</sup>Ca ta' tàta qui' tu'a nna bila'ni cabi ca milagro, pues gutò cabi ettaxtíla de tsè'e cabi le' desiértuá, tì'a ra ttu lettia lo Escritura: Etaxtíla da' de ÿiabara' betie gutò cabi. <sup>32</sup>Jesús nna rèe ca: Hualigani te' riquixa'ánia' le: Álahua qui'ni Moisés bete ettaxtíla nu da' de ÿiabara' qui' qui', sino Tata qui'a nna runne ettaxtíla lígani nu da' de ÿiabara'.

<sup>33</sup>Porqui'ni ettaxtíla nu runna Tata Dios nna née enne' huàdi de ÿiabara' nna rutie la'labani qui' yétsiloyu. <sup>34</sup>Ra tè ca ne: Señor, ttu ttu tsá taá bènna cuià'lu' ettaxtíla' qui' tu'. <sup>35</sup>Becàbi Jesús nna rèe ca: Inte' nua' ná ettaxtíla nu runna la'labani; nuýa tediba tanúá inte' nna labiru túníá, a'hua nuýa tediba tsíalatsi'í inte' nna nunca làa ibìtsi

rùḷ. <sup>36</sup>Pero chi pá'a' le qui'ni màsqui'ba chi rila'ni le inte' nna, pero labí ríalatsi' le. <sup>37</sup>Iyaba ca enne' runna Tatáa latsi' nàya' nna ril-lani cā lani inte'; nuḷa tediba íl-lani ru'a lua' nna, labí cuequua ya' ḷ fuera. <sup>38</sup>Porqui'ni inte' nna daya' de ḷiabarā', aláa para gunia' la' calatsi' quí'ba', sino para guni lá' nu rú'ulatsi' enne' guthèl-le'e inte'. <sup>39</sup>Nui nna nā nu rú'ulatsi' Tatáa enne' guthèl-le'e inte': Qui'ni iyaba nu gúnnee latsi' nàya' nna, nìdi ttuḷ làa gúnittia', sino qui'ni echítha lá' iyaba cā de lo lù'uti canchu chi gal-la' último tsá. <sup>40</sup>Nui nna nā voluntad qui' Tata Dios enne' guthèl-le'e inte': Nuḷa tediba ínna'ḷ Ḷi'nie nna gappā confianza lani e nna, pues lā nna gata' la'labàni nu labí ttíḷ qui'ḷ; inte' nna echítha ya' ḷ de lo lù'uti canchu chi gal-la' último tsá. <sup>41</sup>Làniana gùdulo ca enne' judíua gunne cā contra Jesús porqui'ni rēe: Inte' ná' ettaxtila huàdi de ḷiabarā'. <sup>42</sup>Ra tè luetsi qui'. Tsí álahua nui nuḷ Jesús ḷi'ni Joséḷ, pues hua nabia' bāni ri'ru tātā nāna qui'ḷ. Ti'ala modo acca reḷ qui'ni de ḷiabarā' la huàdiḷ cá. <sup>43</sup>Jesús nna ra tìe cā: Bítuúru inne làna le quia'. <sup>44</sup>Lanú nuḷa ita para tsíalatsi'ḷ inte' canchu álahua Tata Dios enne' guthèl-le'e inte' táhue'e na lani inte'. Inte' nna echítha ya' ḷ de lo lù'uti canchu chi gal-la' último tsá. <sup>45</sup>Escrítubá chi ga'na nu bedia ca profeta qui'ni: Iyaba ca enne' nna idète' cā por Tata Dios. Acca iyaba canu riyénini qui' Tatáa nna, qui'bée ridete' cā acca rita cā lani inte'. <sup>46</sup>Álahua qui'ni nuḷa ttu enne' chi bila'niḷ Tata Dios;

sino làteruba enne' da' de làti dua Tata Dios, pues làbi nna chi bila'ni bi e. <sup>47</sup>Hualigani te' nia' le: Nuḷa tediba enne' ríalatsi'ḷ inte' nna chi té la'labàni nu labí ttíḷ qui'ḷ. <sup>48</sup>Inte' ná' ettaxtila nu runna la'labàni. <sup>49</sup>Ca ta' tātā qui' lía nna gutò cā ettaxtíla to' láḷ maná loti' gutsé'e cā le' desiértuá, pero gùtti ba cā. <sup>50</sup>Pero inte' nna rinnià' acerca de attu ettaxtíla nu da' de ḷiabarā', para qui'ni nuḷa tediba go ettaxtíli nna labí gattiḷ. <sup>51</sup>Inte' ná' ettaxtila nu runna la'labàni, huadia' de ḷiabarā'. Nuḷa tediba gúḷ ettaxtíli nna tulidàni ccabàniḷ. Ettaxtíla nu guté ḷi'ḷ nna nā la'a mísmuba inte', porqui'ni gutia' cuerpo quia' para la'labàni qui' ca enne' tsè'e le' yétsiloyu. <sup>52</sup>Làniana huàdi ttu disgusto entre ca judíua nna ra cā: Ti'ani modo gunna nubéyu'ḷ cuerpo qui'ḷ go ri'ru cá. <sup>53</sup>Jesús nna rēe cā: Hualigani te' nia' le: Canchu labí go le cuerpo qui' Nubeyu' de Ḷiabarā' nna í'ya le réni qui'e nna, entonces labí gata' la'labàni qui' le. <sup>54</sup>Nuḷa tediba chi nā ttùba lani inte' de ruḷ cuerpo quia' nna ri'ya réni quia' nna, entonces chi té la'labàni nu labí ttíḷ qui'ḷ; inte' nna echítha ya' ḷ de lo lù'uti canchu chi gal-la' último tsá. <sup>55</sup>Porqui'ni cuerpo quia' nna réni quia' nna ná cā alimento nu hualigani runna la'labàni. <sup>56</sup>Nu ro cuerpo quia' nna ri'ya réni quia' nna, ttùba chi nā lani inte', ḷ'hua inte' lani ḷ nna. <sup>57</sup>Tata Dios enne' guthèl-le'e inte' nna bānie tulidàba; inte' nna bānia' por medio de lēe. ḷ'hua nuḷa tediba guniḷ inte' recibir ti'atsi ttu alimento para la' labàni qui'ḷ nna,

lànuá nna ccabàniq por medio de inte'. <sup>58</sup>Nui nna ná ettaxtila nu hualigani huàdi de ÿiabara'; alàa tì'a ettaxtila láq maná nu gutò ca ta' tàta qui' lía, pero bì'yu tsá gùtti ba ca; sino nuÿa díbá gúq ettaxtila nu runi yì'ì ofrecer nna, para siempre ní ccabàniq. <sup>59</sup>Iyaba ca enseñánzi gutixa'a Jesús le' sinagoga qui' ca enne' Capernaum.

<sup>60</sup>Biyeni báni nuÿetse' canu denó ca néa ca enseñánzaá nna ra ca: Yala tàbi ná ca titsa'q', nuni ccani guchia' ca cá. <sup>61</sup>Gutelí báni Jesús qui'ni biyeyya ca por nuá nna acca rèe ca: Tsí riyeni dí'ni le por nu níyì'ì cá. <sup>62</sup>Pues, tì'a telá guni le canchu ilá'ni le Nubeyu'a éyyeé ÿiabara' làti dúe néruá cá. <sup>63</sup>Álahua biÿa cosa material ní nua' runna la'labàni, sino Espíritu Santo ba ènni'q' runi qui'ni gata' la'labàni espiritual qui' ca enne'; ca titsa' nu chi pá'a' le nna ná ca espíritu nna la'labàni nna. <sup>64</sup>Pero hua tse'éru entre lebi'i átuchùppa canu labí ríalatsi'. Anía ra Jesús, porqui'ni chía yùe dèsdeba néruá nuÿa ca nuá labí huíalatsi', q'hua nuÿa nuá gutiá ne cuenta latsi' ná' canu làa cca guyu ca ne. <sup>65</sup>Acca rèe: Por nui nna chi pá'a' le qui'ni ni ttu lanú ccani ita para gata' fe qui'ì lani inte' cáalá làa por voluntad qui' Tata qui'a. <sup>66</sup>Dèsdeba lània nna nuÿetse' canu denó ca néa nna beyequía ca nna labiru huía ca lani e. <sup>67</sup>Làniana ra Jesús ca enne' tsì'nuá: Cancu lebi'i nna, tsí càhua latsi' le éyya le cá. <sup>68</sup>Becàbi tè Simón Pedrua nna ra bi e: Señor nuni attu enne' ní éyya tu' ru'a luì sino làteruba cuiq'lu' cá, porqui'ni tùteruba

cuiq'lu' riquixá'a titsa' nu runna la'labàni tulidàba. <sup>69</sup>Intu' nna chi huíalatsi' tu' nna chi yù tu' qui'ni cuiq'bálu' ná Cristo Ýi'ni Tata Dios enne' bàni tulidàba. <sup>70</sup>Becàbi Jesús nna rèe cabi: Tsí álahua chi becuí'a' tsì'nu le, pero nuÿa lá ttu le nna ná huenitsina qui' numalua cá. <sup>71</sup>À' ra Jesús qui' Judas ÿi'ni ttu nu láq Simón Iscariote ba, porqui'ni Judas nuá nu gutiá ne cuenta; uccua huá canu tsì'nuá.

**7** Gutè diba gunne Jesús ca titsa'a nna, le' región qui' Galilea bá gurènie; qui'ni labí uccua latsi'e cuenie le' región qui' Judea porqui'ni canu rigú'ubia' qui' ca enne' judíua nna uccua latsi' qui' gutti ca ne. <sup>2</sup>Exa taá chi debiga' fiesta qui' ca judíua, tiempo de rexa latsi' qui' loti' guÿua ca ta' tàta qui' qui' le' ca yú'u l-la' le' desiértuá nna rue' ca gracia por cosecha qui' qui' nna. <sup>3</sup>Ca bettsi' Jesús nna ra ca ne: Beyya para Judea para qui'ni ca discípulo qui' lu'a nna ilá' huáni ca ca milagro runi lu', <sup>4</sup>porqui'ni ni ttú nu calatsi' ccá enne' ÿeni nna runi gattsì' bá biÿa cania' gunia'; yàqui'ni lu' canì lu' runi lu' ca così nna, mejor la dacca' lótaá beni ca ru'a lo ca enne'. <sup>5</sup>Anía ra ca bettsi' Jesús ne, porqui'ni nìhua làca labí huíalatsi' qui' ne. <sup>6</sup>Jesús nna ra tè ca: Bihua chi gùl-la' tè tiempo para tsa'á', pero lebi'i nna huacca ba tsía le biÿa díbá tiempo ní. <sup>7</sup>Canu yétsiloyuì nna bihua ruyudí' ca le, pero inte' nna hua ruyudí' ca porqui'ni rudea' lo qui' ca hecho mal nu runi ca. <sup>8</sup>Littsia ba lebi'i fiéstaá, pero inte' nna bihua thaya tìa', porqui'ni labí chi gùl-la'

tè tiempo para ccá' declarar lani yétsiloyu. <sup>9</sup>Beyacca díbá rèe cą anía nna, beyà'na tie Galilea.

<sup>10</sup>Pero guda' díbá ca bettsi' áa dia cą nna, ą'hua lèe nna huía huée fiéstaá, pero aláa dàcca'ló tè sino huía gáttsi' bée. <sup>11</sup>Ca judíua nna reyíla cą ne entre iyaba ca enne' tsè'e le' fiéstaá nna ra cą: Gani tì'licua nubéyu'a cá. <sup>12</sup>Ca enne' yétsel'á nna yala gunne cą qui'e. Ttu te cą nna ra cą: Yala enne' tsè' ná bí. Pero áttu te cą nna ra cą: Álahua enne' tsè' nua', sino ruthacca'yí bá yetsi. <sup>13</sup>Pero lanú beyáyani inne dàcca'ló taá qui'e, porqui'ni gutsi báni cą canu rigú'ubia' entre ca judíua. <sup>14</sup>Ttú rilàhui' tì'ga fiéstaá nna bitsina' Jesús le' templua nna gutixe'e ca enseñanza nu cca qui' Tata Dios. <sup>15</sup>Biquíla' bá latsi' ca judíua nna ra cą: Ti'ani modo nabia'ni nui Escritura, labí estudiar chi benia. <sup>16</sup>Becàbi Jesús nna rèe cą: Nu riquixa'ánia' le nna labí ną quia', sino qui' enne' guthèl'le'e inte'. <sup>17</sup>Nu calatsi' guni voluntad qui' Tata Dios nna huènnia cuenta canchu nu riquixa'ánia' le nna ną por mandado qui' Tata Dios o canchu inte' nna rinnéebá' por la' calatsi' quí'ba' acca. <sup>18</sup>Nu rinne por la' calatsi' qui'bí' nna es qui'ni cąba latsi'í gudàliani cą na. Pero ttu enne' calatsi' qui'ni adí ca enne' nna gudàliani cą enne' guthèl'le'e bi nna, entonces làbi nuą' riquixà'a nu ná lí nna labí la' beýia té lani bi. <sup>19</sup>Tsí álahua Moisés nuá benna ley lani le cá. Pero ni ttú le nna labí runi le cumplir nu ra lo ley. Biala qui' acca calatsi' le gutti le inte' cá. <sup>20</sup>Becàbi canu yétsi'á nna ra cą ne:

Loco bá cca lu'. Núní calatsi' guttią lu'. <sup>21</sup>Becàbi Jesús nna rèe cą: Por ttu milagro nu benia' tsá redi' latsi' le nna, acca rechul'la taá latsi' iyaba le. <sup>22</sup>Hualígálàa qui'ni Moisés nna gutixa bi ley qui' circuncisión, ą'hua ca ta' tàta qui' lía ca enne' gutsé'e ántescàla Moisés nna beni huá cą circuncidar. Acca lebi'i nna runi hua circuncidar ca nubeyu' to' biya tediba tsá màsqui'ba ną ttu tsá yeni qui' le. <sup>23</sup>Lebi'í nna runi le circuncidar ttu nubeyu' to' tsá nu labí ná qui'ni guni le biya tsina, solamente para qui'ni làa gudu le ttu lado ley nu gutixa Moisés nna. Bialácca yala ritsa'áni le inte' porqui'ni beyunia' itute cuerpo qui' ttu nubeyu' tsá redi' latsi' le cá. <sup>24</sup>Bittu guni le lu'uxtícia según bá nu rila'ni le lo ra', sino liguni lu'uxtícia según bá nu ná tsè'.

<sup>25</sup>Làniana tuchùppa canu Jerusalén nna ra cą: Tsí álahua nubéyu'í nuá reyíla cą para gutti cą na cá. <sup>26</sup>Línna' tsaáruhuá qui'ni publicamente taá rinnią, pero bihua biya reya cą na. Tsí ína ri'u chía ríalatsi' canu rigú'ubia' le' yetşi qui'ni hualigani nubéyu'i nuá Cristua cá. <sup>27</sup>Nui hua yù ba ri'u gaýa enne' ní ną. Pero canchu chi íl'lani Cristua nna, lanú nuýa ccą saber gáyalá dé'e. <sup>28</sup>De riquixá'ani Jesús ca enne' tsè'e le' templua nna, gunnie iditsa nna rèe: Tsí hualigani nabia'ni le inte'. Tsí hualigani yù le gaýa enne' ni ná' áccá. Pero labí daya' por la' calatsi' quí'ba', sino daya la' por mandado qui' Tata Dios lígani. Lebi'i nna labí nabia'ni li e. <sup>29</sup>Pero inte' ba nna nabia' ti' e, porqui'ni lani labé dú'a' ántesca



ìta' nì; lèe nna guthèl-le'e inte'.

<sup>30</sup>Làniana uccua latsi' quì gudàxu' cã ne, pero nì ttú cã labí beyáyani cã cú'u ná' quì ne, porqui'ni labí chi gùl-la' tè hora de quée sufrir.

<sup>31</sup>Nuýe tsèlgani ca ènni'a nna huíalatsi' quì ne nna ra cã: Canchu chì íl-lani Cristua nna, tsí adírlá ca milagro gunie tì'chula nubeyu'ì cá.

<sup>32</sup>Biyeni bání ca fariséua nu ra ca enne' acerca de Jesús; acca ca sacerdote principal lani ca fariséua nna guthèl-la' chì cã ca policia para gudàxu' cã ne. <sup>33</sup>Jesús nna ra tìe cã: Atuchúppa ubitsa to' teruba rénia' lani le lániana éya'a bá' làti dua Enne' guthèl-le'e inte'.

<sup>34</sup>Hueyíla inte' ba guni le, pero labí étseláni le inte'; làti thua' nna labí ccani le ìta le. <sup>35</sup>Làniana ra luetsi ca judíaua: Gá gání eyya nui qui'ni làa etselá huáni ri'u a cá. Tsí ína ri'u hueyya ýá le' ca yetsi làti gáttí' tsè'e bá ca enne' ná raza qui' ri'u para quixá'aniã ca enne' griego cá.

<sup>36</sup>Biani nua' diániã acca rã: Hueyíla inte' ba guni le pero labí etseláni le inte' porqui'ni làti thua' nna labí ccani le ìta le.

<sup>37</sup>Rechùtsa tsá ýeni gani qui' fiéstaá nna gùdu Jesús lahui' ca enne' ýétse'á gunnie idítsa nna rèe: Canchu nuýa hualigani ribitsiã, pues ná qui'ni itã lani inte' nna í'ya nu ná adiru tsè' para la'labàni qui'ì. <sup>38</sup>Nuýa tediba ríalatsi'ì inte' nna, lániana de lo lòstu'ì nna íria la'labàni tì'a ca yò làti yù'u idíla tsè'ni inda, porqui'ni a' ra lo Escritura. <sup>39</sup>Anía ra Jesús, para qui'ni tsíalatsi' quì ne nna guni cã recibir Espíritu Santo lo loto' quì; pues labí chi gùl-lani Espíritu Santo

lànía, porqui'ni Jesús nna labí nì'í thí'e la' dàliani nu dá' de ýiabara'.

<sup>40</sup>Làniana ttu te canu lání entre iyaba ca enne' ýétse'á biyeni bání cã ca titsa' gunne Jesús nna ra cã: Hua libani qui'ni ènni'ì nua' ná profeta enne' rinne parte Tata Dios. <sup>41</sup>Attu te cã nna ra cã: Là ènni'ì nua' Cristua enne' ribeda ri'u íl-lani le' yétsiloyu. Adí cã nna ra cã: Tsí ína ri'u qui'ni de Galilea lá ná qui'ni íl-lani Cristua cá. <sup>42</sup>Tsí álahua ra lo Escritura qui'ni le' familia qui' David enne' uccua rey ná qui'ni íl-lani Cristua le' Belén yetsi qui' la'a mísmuba David. <sup>43</sup>Acca ca enne' tsè'e cã nía nna ritìl-la ritsa' bá cã por nu cca qui' Jesús. <sup>44</sup>Ttu te cã nna uccua latsi' quì cú'u ná' quì ne; pero nì ttuã lanú beyáyani gudàxu'ã ne.

<sup>45</sup>Beyeqquia ba ca policia nna gunaba titsa' ca sacerdote principal a'hua ca fariséua cã nna ra cã: Biecca làa déché' li a nì'i. <sup>46</sup>Becàbi ca policiaá nna ra cã: Nunca labí nì'i íria ttu enne' quixa'a tì'a riquixá'a nubéyu'a'. <sup>47</sup>Becàbi ca fariséua nna ra cã: Tsí tsa' tehuá lebi'ì chi guýacca'ýí le cá. <sup>48</sup>Tsí ína ri'u qui'ni nuýa ttu ca enne' rigú'ubia' qui' ri'uã' o nuýa ttu ca fariseo chi huía latsi' cabi qui'ì cá. <sup>49</sup>Pero iyaba ca enne' tonto tsè'e nà' chi huíalatsi' quì qui' nubéyu'a', pues basta gáláa qui'ni labí nabia'ni cã nu ra lo ley qui' religión qui' ri'u acca chía gunittí cã. Anía ra ca fariséua. <sup>50</sup>Làniana Nicodemo nu huía ru'a lo Jesús de réla lá, uccua huáchúã ttu canu fariséua; gùduliã nna rã iyaba ca fariséua: <sup>51</sup>Tsí hua riquixá'a lo ley qui' ri'u qui'ni ttu

nubeyu' nna ccá taá castigar sin qui'ni làa iyesi yáni ri'u declaración qui'ñi nna cca ri'u saber nu benia cá. <sup>52</sup>Becàbi cą nna ra cą na: Tsí yà' huání lu' ná lu' nu Galileo cá. Pues gútsatsáruhuá lo Escritura para qui'ni ennia lu' cuenta qui'ni nunca ni'i iria ttu profeta le' región qui' Galilea'. <sup>53</sup>Làniana gùduli cą nna deyya tè litsi' tsa ba qui'.

**8** Huía te Jesús lo i'ya láą Monte de los Olivos. <sup>2</sup>De díla lá nna betsine'e attu le' templua. Iyětse' ca enne' nna bitsina' cą ru'a lúe. Lèe nna gure' bánie nna gutixa'ánie cą ca enseñanza nu cca qui' Tata Dios. <sup>3</sup>Làniana ca maestro de la ley, ą'hua ca fariséua nna tahua' cą ru'a lúe ttu niula beýuna'nì cą na runia adulterio. Bedu tè cą na lahui' nna, <sup>4</sup>ra cą ne: Maestro, beýuna'nì tu' niulí méruaní runia adulterio. <sup>5</sup>Lo ley nu bethá'na Moisés nna runi mandado gutti ri'u luetsi ca niulí lani íyya. Cuía'chulu' nna, ti'ala ína lu' ccá qui'ñi cá. <sup>6</sup>Anía ra cą para guni ba cą ne prueba nna gappa cą néda biya causa ni gutsia cą qui'e. Pero Jesús nna gúnne'e loyu nna bènìe letra lani yūbené'e. <sup>7</sup>Beni bá cą seguir gunàba titsa' cą ne, acca bebé' tsè' tènìe gunne'e cą nna rèe: Nuya la ttu le nu bíttu tení tul'la' chi benia nna, lą nna hué' bą niulą' primero íyyá. <sup>8</sup>Làniana gúnne'e loyu attu nna bènìe letra attu. <sup>9</sup>Biyeni bání cą ca titsa'a nna, la' rulaba latsi' qui' qui' labí be'él:la'ą cą qui'ni hué' cą niuláa, acca gùdulo chía ttu ttu tsa cą beria cą fuera, dèsdeba canu adiru enne' gùla hàstaba nu adiru nu cuiti'a. Beya'na tè tūteruba Jesús

ą'hua niula nu beda cą làhui'a nna. <sup>10</sup>Gulitha tè lo Jesús attu nna nìdi áttuą lanuru té, sino là terúbá niuláa du nía, acca ra tie na: Niula, gání ti'iccua canu beni contra lu'a. Tsí nùhua nuya bé'ą lu' íyyá. <sup>11</sup>Becàbią nna rą ne: Lanú nuya Señor. Jesús nna ra tie na: Nihua inte' nna bihua gunia' lu' condenar; beyya ba nna, bíttuúru guni lu' tul'la'.

<sup>12</sup>Attu vuelta gutixa'áni Jesús ca enne' nna rèe: Inte' ná' la'yani' para yétsiloyu; nuya tanúą inte' nna labiru cuenía le' chul'la, sino chi té la'yani' nu ną la'labàni para lą. <sup>13</sup>Làniana ra tè ca fariséua ne: Nu riquixá'a lu' nna labí ną lígani porqui'ni rudàliani lu' la'a lu' bá. <sup>14</sup>Becàbi Jesús nna rèe cą: Màsqui'ba riquixà'a' nu cca quíbá', pero riquixà'a bá' nu lígani, porqui'ni hua yú bá' gáyalá daya' ą'hua gáyalá éya'a'. Pero lebi'i nna labí yù le gáyalá daya' nìhua gáyalá éya'a'. <sup>15</sup>Lebi'i nna runi le juzgar según la' rulába latsi' qui'ba le. Inte' nna núhuá nuya runia' juzgar. <sup>16</sup>Pero canchu runia' lù'uxticia nna, es qui'ni lù'uxticia quíyil'í nna ną de acuerdo lani nu ná lí; porqui'ni álahua ttua' ná, sino qui'ni Tata Dios enne' guthèl:le'e inte' nna du bée lani inte'. <sup>17</sup>Lo ley qui' le nna riquixà'a qui'ni nu inne chuppa ca testigo nna, lànua ną titsa' lígani. <sup>18</sup>Inte' nna riquixà'a' nu cca quíbá'. ą'hua Tatáa enne' guthèl:le'e inte' nna rute huéé testimonio acerca de inte'. <sup>19</sup>De rèe ca titsa'a nna, ra tè cą ne: Gání ti'iccua Tàta qui' lu'l cá. Becàbi Jesús nna rèe: Labí nabia'ni le inte' nihua Tàta quíya'a. Cálá

runibia' le inte' nna, pues gunibia' huá le Tàta quíya'a. <sup>20</sup>Iyaba ca tìtsa'a gunne Jesús exa taá làti rigú'u ca ofrenda loti' gutixè'e ca enseñanzaá le' templua. Pero lanú nuŷa bedàxu'á ne preso, porqui'ni labí chi gùl'la' tè hora quì'e.

<sup>21</sup>Attu vuelta nna ra Jesús ca: Inte' nna éya'a bá'; lebi'i nna huàl'lani tsá eyìla le inte', pero le' ca tul'la' quì'ba le gatti le. Làti éya'a' nna labí ccani le ìta le. <sup>22</sup>Làniana ra tè ca judíua: Aŷa càba latsi' nui gutti la'a labá acca ra: Làti éya'a' nna labí ccani le ìta le. <sup>23</sup>Jesús nna rèe ca: Lebi'i nna, nu yétsiloyu ba na le, pero inte' nna de ŷiabara' lá ná'. Lebi'i nna ná le nu yétsiloyuj, inte' nna labí ná' nu yétsiloyuj.

<sup>24</sup>Por nui nna nia' le qui'ni le' ca tul'la' quì'ba le gatti le. Porqui'ni canchu bihua tsíalatsi' le qui'ni inte' nui nna, le' ca tul'la' ba gatti le.

<sup>25</sup>Làniana ra ca ne: Núní ná lu' nì'i. Jesús nna rèe ca: Nu chibá pá'a' le dèdèba néruá. <sup>26</sup>Nu ŷeni té quíxa'a' nu cca qui' le, á'hua gunia' declarar juicio contra lebi'i, porqui'ni enne' guthèl'le'e inte' nna rinnie nu lígani; inte' nna, nu chi biyeni bá te' gunnie nna á' bá riquixa'a' ru'a lo ca enne' le' yétsiloyu. <sup>27</sup>Anía gutixà'a Jesús, pero labí bennia ca cuenta qui'ni gunènie ca nu cca qui' Tata Dios. <sup>28</sup>Raá ruhuée ca: Canchu chi gal'la' tsá ichitha le Nubeyu' de ŷiabara', lànialá nna ennia le cuenta qui'ni inte' bá nuá. A'hua labí biŷa runia' por la' calatsi' quí'ba', sino tì'a nu gutixa'áni Tatáa inte', á' bá rinnia'. <sup>29</sup>Porqui'ni Tatáa enne' guthèl'le'e inte' nna du bée lani inte' nna labí rúts'e latsi'e

inte'; porqui'ni siempre ní runia' nu rú'u latsi'e. <sup>30</sup>De gunnie ca tìtsa'a nna, nuŷetse' ca enne' nna huálatsi' quì ne.

<sup>31</sup>Jesús nna rèe ca judío canu chi huálatsi' quì ne: Canchu guni le seguir ccá le tsittsi lani ca tìtsa' quia' nna, á' modo nna rulue'ní qui'ni ná le ca discípulo quia' nna, <sup>32</sup>gunibia' tè le nu ná lígani. Por ca tìtsa' liganiŷ nna ccá le libre. <sup>33</sup>Ra tè ca ne: Intu' nna ná tu' descendiente qui' Abraham enne' gùdua tiempo antigua. Nunca labí chi uccua tu' esclavo qui' nuŷa. <sup>34</sup>Becàbi Jesús nna rèe ca: Hualigani te' nia' le qui'ni iyaba canu tul'la' nna, pues esclavo qui' tul'la' ná ca. <sup>35</sup>Tì'a ttu esclavo nu runi servir le' ttu yú'u nna álahua tulidà duá le' litsi' xàni'í, pero ttu ŷi'ni nna tulidàba ccá pertenecer le' yú'u qui' tàta quì'í. <sup>36</sup>Acca canchu inte' ŷi'ni Tata Dios nna gudilá'a' le nna, es para qui'ni gata' libertad nu ná lígani qui' le. <sup>37</sup>Hua yú bá' qui'ni ná le descendiente qui' Abraham, pero calatsi' le gutti le inte' porqui'ni labí ritsina' tsè' ca tìtsa' quíyi'í lo losto' le. <sup>38</sup>Inte' nna riquixà'a' nu chi bilá' te' loti' dú'a' le' presencia qui' Tàta quí'a, pero lebi'i nna runi le tì'a nu chi bethète'ni tàta qui' lía le. <sup>39</sup>Becàbi ca nna ra ca Jesús: Abraham bá ná tàta qui' tu'. Jesús nna ra tìe ca: Cálalá hualigani ná le ŷi'ni Abraham nna, pues hua runi le nu ná tsè' tì'a beni Abraham. <sup>40</sup>Pero annana càla latsi' le gutti le inte', màsqui'ba chi gutixa'ánia' le nu ná lí según bá nu belue'ni Tata Dios inte'. Abraham nna nunca labí beni

bi tì' runi le. <sup>41</sup>Lebi'i nna runi le tì'a nu runi tàta qui' lía. Ra tè cạ ne: Intu' nna aláa nùtì'dí ná tàta qui' tu'. Tùteruba tàta qui' tu' dua, née Dios. <sup>42</sup>Làniana ra Jesús cạ: Cálalá Dios ná tàta qui' le nna, hualigani hua catsilí lání le inte' cá; porqui'ni birí'a' le' ÿiabara' làti dua Tata Dios nna gúl'lania' nì. Nìhua labí daya' por la' calatsi' quí'bá, sino labée guthèl'le'e inte'. <sup>43</sup>Biecca labí ritelíni le la' rinne quia' cá. Es porqui'ni labí rennia le cuenta nu riquixa'ánia' le. <sup>44</sup>Tàta qui' le nna nà numalua; ą'hua nu rú'ulatsi' tàta qui' lía, ą' bá ná nu calatsi' le guni le. Porqui'ni numalua nna dèsdèba nérúa nà huètti enne', ą'hua púruání nu bèyia bá nà nna labí nu lí té lani ą. La' rinne qui'ni nna nà puru taá bèyia, pues ą' bá runia porqui'ni nà tàta qui' la' bèyia. <sup>45</sup>Pero porqui'ni inte' rìnnia' nu ná lí nna, labí ríalatsi' le quia'. <sup>46</sup>Núní ttu le gutsia falta quia' qui'ni nu rìnnia' nna álahua nà lígani cá. Pues siempre ba rìnnia' nu ná lí nna, bialácca labí ríalatsi' le quia' nì'i. <sup>47</sup>Nuḡa tediba ná qui' Tata Dios nna rudà nàgui' ca titsa' qui'e. Pero lebi'i nna labí rudà naga' le ca titsi' porqui'ni labí ná le enne' qui' Tata Dios.

<sup>48</sup>Becàbi ca judíua nna ra cạ ne: Hualibani tu' ra tu' qui'ni ná lu' nu samaritano nna dua ttu espíritu malo lo losto' lu' nna chi runia lu' loco. <sup>49</sup>Jesús nna ra tìe cạ: Álahua loco cca inte', sino qui'ni rudàliani lá' Tàta qui'a. Lebi'i nna rìniyu lá le inte'. <sup>50</sup>Bihua reyìla' nuḡa gudàlianią inte', pues hua dua ba enne' rinnie a favor de inte'.

Lèe nna née Juez. <sup>51</sup>Hualigani te' riquixa'ánia' le: Nuḡa tediba runi obedecer ca titsa' quiyí' nna, nunca labí gattią. <sup>52</sup>Làniana ra ca judíua ne: Anna lá nna hua yù tu' qui'ni yù'u ttu espíritu malo lo losto' lu'. Abraham nna gùttì ba bi, ą'hua ca profeta nna, atsi'íni lu' nna dá' tè lu' rena lu': Nuḡa tediba rigua cạ titsa' quiyí' nna jamás labí gattią. <sup>53</sup>Tsí ína ri'u adila enne' ÿeni ná lu' tì'chula ta' tàta qui' tu' Abraham. Lèe nna màsqui'ba uccue enne' yéni, pero gùttì bée. ą'hua ca profeta nna gùttì hua cabi. Núní cani lu' ná lu' nì'i. <sup>54</sup>Becàbi Jesús nna rée cạ: Cálalá inte' rudàliania' la'a inte' ba nna, entonces la' dàliani quiyí' nna labí biḡa dàcca'ą. Pero la'a mísmuba Tata Dios enne' rena le qui'ni runi li e adorar, lèe ènni'a' rudàlianie inte' porqui'ni née Tata quia'. <sup>55</sup>Lebi'i nna labí nabia'ni li e, pero inte' nna hua nabia' ti' e. Canchu innia' qui'ni bihua nabia' ti' e nna entonces ná' ttu bèyia tì'a lebi'i; pero hualigani nabia' ti' e nna rigú'a' ca titsa' qui'e. <sup>56</sup>Ta' tàta qui' le Abraham nna yàlaní bedacca' latsi' bi de uccua bi saber qui'ni huàl'ani tiempo qui'ni ita' le' yétsiloyu; de bila'ni bi ą nna adírlulá bedacca' latsi' bi. <sup>57</sup>Ra tè ca judíua ne: Nìhua tsìayona' ida nì'i labí chi du lu' nna, atsi'íni du te lu' rena lu' qui'ni bila'ni lu' Abraham. <sup>58</sup>Jesús nna rée cạ: Hualigani te' nia' le: Ántesca galia Abraham nna, chílá dú'a'. <sup>59</sup>Làniana gutèl'la' cạ íyya para hué' cạ Jesús nna gutti cạ ne, pero lèe de repente taá betìe lahui' qui' nna berie le' templua nna déyyeé.

**9** Néda bá deyu'u Jesús nna, bila'ni e ttu nubeyu' ciego ri'á nía. Nubéyu'a nna dèsdeba gùliá nà ciego. <sup>2</sup>Gunàba titsa' tè ca discípulo qui'áa ne nna ra cabi: Maestro, núní gulú'u falta acca gùlia nubéyu'i ciego, tsí labá, o, tsí tàta nàna quì'i áccá. <sup>3</sup>Becàbi Jesús nna rée cabi: Álahua nui rappa tul-la', ñihua tàta nàna qui'i nna, sino gùliá ciego para qui'ni ilá'ni la'huacca qui' Tata Dios lani á. <sup>4</sup>Náduel-la' qui'ni gunia' tsina qui' Enne' guthèl-le'e inte' daca'tè renia' le' yétsiloyu; porqui'ni huàl-lani hora canchu chi lanuru nuña guni tsina. <sup>5</sup>Miénttraste renia' le' yétsiloyu nna, la'yani' ná' para yétsiloyu. <sup>6</sup>Jesús nna de chi rée anía nna, betùtu tè xèni'e loyu nna, benie gútsa' lani xèni'a, gutàbi tìe gútsa'á lo nubeyu' ciéguá. <sup>7</sup>Ra tìe na: Huía tañi lo lu' ru'a pozo Siloéa'. Siloé nua' tì'ba nu rena ri'u Mandado. Lã nna huía tiã tañi lúj; de beyéqquiã nna chi rilá'niã. <sup>8</sup>Làniana ca vecino qui' niá á'hua adí canu bila'ni çã na qui'ni nã ciego nna ra çã: Tsí álahua nui nuá nu ribe' huenàba caridad cá. <sup>9</sup>Tuchùppa çã nna ra çã: Nui nuá. Attu te çã nna ra çã: Ti'taání nuá rului'ã. Lã nna rã: Inte' bá nui. <sup>10</sup>Acca gunàba titsa' çã na: Biani beni lu' acca biyàlia iyyaló lu' cá. <sup>11</sup>Becàbiã nna rã: Enne'yu' lá bí Jesús beni bi gútsa' nna gutàbi bi iyyalúá' nna ra tè bi inte': Huía tañi lo lu' ru'a pozo Siloéa'. Hua'á tia' gutíi lua' nna bilá' te'. <sup>12</sup>Làniana ra çã na: Gani tì'ccua nubéyu'a. Lã nna rã: Labí yù inte'. <sup>13</sup>Guche' tè çã nu uccua ciéguá ru'a lo ca fariséua. <sup>14</sup>Loti' beni

Jesús gútsa'á nna benie qui'ni bila'ni nubeyu' ciéguá nna uccua ttu tsá nu labí runi ca judíua biña tsina. <sup>15</sup>Canu denó religión fariseo nna bedenàba titsa' çã nubéyu'a tì'iýalá benia biyàlia lúj. Lã nna rã çã: Gutàbi bi gútsa' lua' nna, gutíi tè lua', annana rila' te'. <sup>16</sup>Tuchùppa ca fariséua nna ra çã: Álahua enne' qui' Tata Dios ná nubéyu'a' porqui'ni labí rigua tsá ná qui'ni édi' latsi' ri'u. Attu te çã nna ra çã: Pero ti'ani modo ccani ttu nubeyu' guniã luetsi ca milágrui canchu ná bã ttu nu tul-la' ñi'i. Acca ritil-la ritsa' bá çã tsè'e çã. <sup>17</sup>Làniana gunàba titsa' çã attu vuelta nu uccua ciéguá nna ra çã: Lù'chu nna, biani ra lu' qui' nu guthàlia lo lu' á'. Lã nna rã: Ná bi ttu profeta qui' Tata Dios. <sup>18</sup>Pero ca judíua nna labí huíalatsi' qui' qui'ni nubéyu'a nna primero uccua ciego, acca gutãyi çã hàstaá tàta nàna qui' nu chi biyàlia iyyaló niá. <sup>19</sup>Gunàba titsa' tè çã nna ra çã: Tsí nui nuá ýi'ni lía nu rena le qui'ni gùliá ciego. Ti'ala modo acca annana rilá'niã ñi'i. <sup>20</sup>Becàbi ca tàta nàna qui' nubéyu'a nna ra çã: Hualígálàà nui nuá ýi'ni tù'a, ciégubá nã loti' gùliã, <sup>21</sup>pero tì'iýalá modo acca rilá'niã annana, bihua yù tu'; ñihua làa yù tu' nuña guthàlia iyyalúj nna. Nu gùla ba chi nã; pues làba linàbatitsa', là nna huacca báníã quixá'ã nu cca quì'i. <sup>22</sup>Anía ra ca tàta nàna qui' niá porqui'ni gútsi bání çã canu rigú'ubia' entre ca judíua, porqui'ni chi gunne lettia çã gudàl-la çã fuera sinagoga qui' caníã iyaba canu ína qui'ni Jesús nna née Cristo. <sup>23</sup>Acca tàta nàna qui' nubéyu'a nna ra çã ca fariséua:

Nu gùla bá chi ná, nà' bá linàbatìtsa' a. <sup>24</sup>Làniana bedeyàyì gábá cą nu uccua ciéguá nna ra cą na: Bè' gracia Tata Dios aláa nubéyu'a. Intu' nna yù tu' qui'ni nubéyu'a' nna ná nu tul-la'. <sup>25</sup>Becàbią nna rą: Bihua yúá' canchu ná bi enne' tul-la', pero ttu cosa nna hua yúá': qui'ni inte' nna uccua'a' ciego, pero annana rilá' té'. <sup>26</sup>Redeya tè cą na: Biani benią qui' lu'. Ti'ani modo guthàlią iyyaló lu' cá. <sup>27</sup>Becàbią nna rą cą: Chìyā pá'a' le nna, pero bihua bedà' naga' le. Bianicca calatsi' le quixa'ánia' le attu nì'i. Tsí a'hua lebi'i nna calatsi' le ccá le discípulo qui' bi áccá. <sup>28</sup>Làcą nna beduadí' lá cą na, nna ra cą: Lù'ba ná discípulo qui'ì yā, pero intu' nna discípulo qui' Moisés bá ná tu', <sup>29</sup>intu' nna yúlì ragánì tu' qui'ni Tata Dios nna gunnie directamente taá lani Moisés, pero acerca de nubéyu'ì nna nìdi làa yù tu' gáyalá dá'a. <sup>30</sup>Làniana ra nubéyu'a cą: Caýí bá látsa'a' qui'ni lebi'i nna labí yù le gáyalá da' bi, pero beni bi ttu milagro lani ca iyyaló yì'ì acca chi rilá' té', <sup>31</sup>hua yù ba ri'u qui'ni Tata Dios nna labí rudà nague'e qui' canu tul-la'; pero canchu nuýa rąppą ne respeto a'hua runią nu rú'ulatsi'e nna, lànua nna recàbie qui'ì, <sup>32</sup>pues iyaba ca tiempo nu chi gutè nna, bihua nì'i iyénini ri'u canchu nuýa chi guthàlią iyyaló ttu nu gùlia ciego, <sup>33</sup>cáalá ènne'yu'a bihua da' bi de ýiabara' làti dua Tata Dios nna, entonces labí biýa ccani bi guni bi. <sup>34</sup>Becàbi cą nna ra cą na: le' tul-la' bá nàliani lu', átsi'ini lu' lá runna lu' intu' consejo cá. Làniana bedà'la cą na fuera sinagoga qui' caniá.

<sup>35</sup>Bina tè Jesús qui'ni bedà'la cą nubéyu'a fuera, betsà' tiè na áttu nna rèe na: Tsí hua ríalatsi' lu' Ýi'ni Tata Dios qui'ni té la'huacca qui'e cá. <sup>36</sup>Becàbią nna rą ne: Señor, núnì ènni'a' para qui'ni gappa' fe lani e. <sup>37</sup>Jesús nna rèe na: Pues, chía bila'ni lu' e; làbe nui rue' lani lu' titsa'. <sup>38</sup>Nubéyu'a nna ra tią ne: Hua ríalátsa'a' Señor. Làniana bèni tią ne adorar. <sup>39</sup>Raáruhuá Jesús: Inte' nna daya' yétsiloyuì para qui'ni ilá'ní ti'iyā ná la' rulábalatsi' qui' ttu ttu enne': para qui'ni canu labí rila'ni nna ila'ni cą; a'hua canu rulába latsi' qui'ni rila'ni cą nna ccá lá cą ciego. <sup>40</sup>Biyeni bání tuchùppa ca fariseo tsè'e ru'a lúe lànía ca tìtsi'ì nna ra tè cą ne: Tsí ina ri'u qui'ni intu' nna ciego huá ná tu' cá. <sup>41</sup>Becàbini Jesús cą nna rèe: Cáalá ná telá le ciego nna entonces labí causa qui' le té por ca tul-la' qui' le. Pero porqui'ni rena le: Rila'ni tu', acca rilá' rabánì qui'ni ná le responsable por ca tul-la' qui' le.

**10** Hualigani te' riquixa'ánia' le: Nuýa labí ra'a lado ru'a puerta qui' cúrrali qui' ca carnero, sino qui'ni rąppią attu ládulá para gá'a le' cúrraliá, pues lànua nna ná ubàna nu ribèqquia gąttsi' nna. <sup>2</sup>Pero nu ra'a bá lado ru'a puértaá nna, làbą nuá pastor qui' ca carnérua. <sup>3</sup>Nu rue' cuidado ru'a puértaá nna rithàlią para gá'a nu ná pastor. Ca carnérua nna nabia' bání cą enne' ná pastor qui' caniá de riyénini cą tsì'ì; pastor nna conforme ba rudèttią láa ca carnérua nna riria cą fuera. <sup>4</sup>De chi tsè'e iyaba ca carnero qui' niá fuera nna, lą nna rinéru tią lo qij;

ca carnérua nna ritanó tè cã na de riyénini cã tsì'ì. <sup>5</sup>Pero áttu nuhuaya' nna labí tanó cã na, sino ucuítta lá cã ru'a lúí porqui'ni labí nabia'ni cã tsì'ì canu huaya'. <sup>6</sup>Comparación nì nna gutixa'áni Jesús cã, pero labí gutéelíni cã biya nuá rèe cã.

<sup>7</sup>Acca Jesús nna ra huée cã attu: Hualigani te' nia' le: Inte' ná' tì'a ttu puerta para gá'a ca carnero.

<sup>8</sup>Iyaba canu bita ántesca inte' nna ubàna nna huebèqquia gàttsi' bá nna ná cã, pero ca carnéruj nna labí caso beni cã qui' qui'. <sup>9</sup>Inte' ná' puerta de salvación. Nuya gá'a ru'a puértj nna labiru duã lo peligro; a'hua gata' huá la'yeni qui'ì tì'a ttu carnero to' nu ra'a reria bá le' cúrrali qui'ì nna ritaxácca'a'íxi' to' ruã. <sup>10</sup>Ttu ubana nna labí itã canchu lahuá para cuana terubã nna guttiã nna gutàppa'a' nna. Pero inte' nna daya' para qui'ni gata' la'labàni qui' le, pero ttu la'labàni i'yeni nna completo nna. <sup>11</sup>Inte' ná' Pastor Tsè'. Por ejemplo: ttu enne' nu rappa tsè' carnero nna, là nna ga'nã dispuesto iria latsi' la'labàni qui'ì por ca carnero to' qui'ì. <sup>12</sup>Pero ttu nu nãya bání nna, pues bihua nã propio gání pastor, ñihua labí nã xana' ca carnérua. Acca canchu ilá'niã da' ttu lobo nna entonces gútse'le taá latsi'ì ca carnérua nna ucuítta; làniana lóbuá nna gudãxu'a tuchùppa cã miéntraste ràthilàlia bá adí cã. <sup>13</sup>Acca nu nãya bánía nna ucuítta bã porqui'ni mozo teruba nã, bihua nùyue caniã para hu'ã cuidado ca carnérua canchu ril·lani peligro. <sup>14</sup>Inte' ná' Pastor Tse'. Acca nabia' te' ca carnero quia'. Làcã nna nabia'ni cã inte', <sup>15</sup>tì'ba

Tata quíya'a nabia'nie inte'; inte' nna nabia' ti' e. A'hua riria látsa'a' la'labàni quia' por ca carnero to' quia'. <sup>16</sup>Tsè'e huá attu te ca carnero labí yù'u cã le' cúrrali; a'hua canuá nna caduel·la' huá ta'yí ya' cã. A'hua làcã nna gudã naga' qui' tsí'a' nna tsé'e iyaba cã bajo cuidado qui' tùteruba Pastor. <sup>17</sup>Acca por nui nna yala catsi'íni Tata quí'a inte', porqui'ni gútía' la'labàni quia' para edi' ya' a' attu. <sup>18</sup>Lanú nuya ccani cúa la'labàni quia', porqui'ni làteruba por la' calatsi' quíba' rutée ya' a. Té bá derecho quia' para gutée ya' a, a'hua para edi' ya' a' attu nna. Nui nna beni Tata quí'a inte' mandado gunia'.

<sup>19</sup>Ritì·la ritsa' bá ca judíua tsè'e cã attu por ca titsa' qui' Jesús nna uccua cã chuppa l·la'a. <sup>20</sup>Nuyetse' cã nna ra cã: Ttu espíritu malo yù'u lo losto' nuã a'hua loco bá cã, bianicca rudà naga' le qui'ì. <sup>21</sup>Pero attu te cã nna ra cã: Alàa luetsi ca titsa'a' rinne ttu nu yù'u espíritu malo lo lòstu'ì, tsí ína ri'u huathàlia ttu espíritu mal iyyaló cc ciego cá.

<sup>22</sup>Gùl·la' tè fiesta qui' ca judíua tsá rue' cã gracia Tata Dios por qui'ni beyacca templua qui' caniã attu. Làniana uccuã tiempo dìl·la'. <sup>23</sup>Jesús nna reni tie làti dua templua, ru'a portal qui' ta' rey Salomón. <sup>24</sup>Ca judíua nna bitùbi cã ru'a lúe nna ra cã ne: Cuani gudùtsi lu' bíttuúru úccubi ya'a lu' latsi' tu'. Canchu lu' nua' Cristo nna entonces ná qui'ni quixá'ani lu' intu' claru taá. <sup>25</sup>Becàbi Jesús nna rèe cã: Chíya gutixa'ánia' le, pero labí rialatsi' le. Ca cosa nu runia' lani nombre qui' Tàta quí'a nna rulue'



ca nu cca quia'. <sup>26</sup>Pero lebi'i nna àtsahua làa ríalatsi' le, porqui'ni labí ná le nuŷa ttu ca carnero quia', tì'ba nu chi gutixa'ánia' le. <sup>27</sup>Ca carnero quia' nna riyénini ca tsí'a'; inte' nna nabia' te' ca; làca nna denó ca inte'. <sup>28</sup>Inte' nna rùtià' la'labàni nu labí ttíā qui' qui; jamás labí nitti ca, ñihua lanú nuŷa cúā ca lo nàya' nna. <sup>29</sup>Tàta quia' enne' benne ca lani inte' nna, adí la'huacca té quì'e tì'chula nuŷa tediba. Lanú nuŷa ccani cúā ca lo ná' Tata quí'a. <sup>30</sup>Inte' nna Tatáa nna ttùba ná tu'. <sup>31</sup>Làniana bededàxu' ca judíua íyya para hué' ca ne. <sup>32</sup>Jesús nna ra tìe ca: Iŷetse' ca cosa tsè' chi benia' por la'huacca qui' Tata quí'a. Por núlá ca così acca da' le hué' le inte' íyya para gutti le inte' cá. <sup>33</sup>Becàbi ca judíua nna ra ca ne: Álahua por ttu cosa tsè' nu chi beni lu' calatsi' tu' hué' tu' lu' íyya, sino porqui'ni labí respeto té qui' lu' lani Tata Dios. Enne' bá ná lu', atsi'íni rena tè lu' qui'ni ná lu' Dios. <sup>34</sup>Jesús nna rèe ca: Tsí álahua ga'na escrito lo ley qui' le qui'ni Tata Dios nna rèe ca enni'a: Lebi'i bá ná le ca dios. <sup>35</sup>Yù ri'u qui'ni nu ra lo Escritura nna nā títsa' lí tulidà taá. Tata Dios nna chi rèe qui'ni ná ca dioses porqui'ni gu'lani títsa' quì'e lani ca. <sup>36</sup>Inte' enne' becué' Tata Dios nna guthèl-le'e inte' yétsiloyu, bialácca lebi'i nna rena le qui'ni labí respeto té quia' lani e porqui'ni nia': Inte' ná' Ÿi'ni Tata Dios. <sup>37</sup>Cáalá bihua runia' ca tsina qui' Tata quí'a nna, entonces razón bá téni le làa ríalatsi' le quia'. <sup>38</sup>Pero hua runi ya' ca, acca màsqui' làa ríalatsi' le quia' pero lítsia

latsi' qui' nu rila'ni le runia', para qui'ni ennia le cuenta nna tsíalatsi' le qui'ni Tatáa nna dùe lani inte', a'hua inte' lani Tatáa nna. <sup>39</sup>De ra Jesús anía nna, attu vuelta uccua latsi' ca judíua gudàxu' ca ne preso, pero lèe nna tsàsti taá becuittée ru'a lo qui. <sup>40</sup>Huía tìe attu lado yò Jordán, lugar làti gureni Juáan primero loti' beni bi bautizar. Nía nna gùdue. <sup>41</sup>Pero enne' ŷétse'ní huía ru'a lúe nna ra ca: Juáan nna hualiba labí biŷa milagro ni beni bi, pero iyaba nu gutixa'a bi acerca de ènni'í nna nā nu lígani. <sup>42</sup>Nía nna nuŷetse' ca enne' huíalatsi' qui Jesús por primera vez.

**11** Gùdua ttu nubeyu' láā Lázaro, yala fuerte hui'niā. Uccua enne' Betania yetsi qui' María lani ŷilíj Marta. <sup>2</sup>Lázaro nu rà'nia nna uccua dàna María nu beduā unguento iqquia Jesús nna bedibìtsi tìā ca ñi'e lani itttsa' iqqi. <sup>3</sup>Ca dàna Lázaruá nna guthel-la' ca mandado tayàtsi ca Jesús: Señor, nu yala ccátse' cuiā'lu'a nna rà'nia. <sup>4</sup>Biyeni báni Jesús noticia nna rèe: Itсахue' qui' Lázaruá nna labí nā para gáttiniā, sino para ilá'ni la'huacca qui' Tata Dios, a'hua por medio de itsahue' qui'í nna tháliani Ÿi'ni Tata Dios. <sup>5</sup>Jesús nna yala uccuatsi'e Lázaruá nna Mártaá nna a'hua ŷilíj María nna. <sup>6</sup>Pero Jesús nna gulèda bée áchúppa ubitsa làti ri'áa bitola de binee noticia. <sup>7</sup>Bitola nna ra Jesús ca discípuluá: Lítsa' Judea attu. <sup>8</sup>Ca discípuluá nna ra cabi e: Maestro, ca judíua nna chì' uccua taá latsi' qui hué' ca cuiā'lu' íyya. Biecca calatsi'íru cuiā'lu' tsia cuiā'lu' nía attu ñi'i. <sup>9</sup>Becàbi Jesús

nna rèe çà: Tsí álahua tsì'nu hora nua' cca ttu tsá cá. Nuŷa tediba ribèni de ritsá nna labí ribixià, porqui'ni rilá' bánià por la'yani' qui' ritsá. <sup>10</sup>Pero nuŷa tediba ribèni de réla nna ribixi taá, porqui'ni labí la'yani' té lani à. <sup>11</sup>Làniara raáruhuée cabi: Amigo qui' ri'u Lázaruá nna ti'áthi bá annana dí'a' tádibáni ya' à. <sup>12</sup>Ra tè ca discípulo qui'áa: Señor, canchu ti'áthi bá nna hueyàcca bá latsi'ì. <sup>13</sup>Pero Jesús nna acerca de lù'uti qui'ba Lázaruá nuá rèe anía, pero ca discípuluá nna belaba latsi' cabi qui'ni gunnie acerca de bétsiala. <sup>14</sup>Làniara ra Jesús cabi claru taá: Lázaruá nna chi gùttià, <sup>15</sup>pero yala redacca' te' qui'ni lànua' té nía, porqui'ni annana ila'ni le la'huacca quia' nna gappa le fe lani inte'. Éyya ri'u tayu ri'u à. <sup>16</sup>Làniara Tomás enne' reya cabi cúachi'á nna ra bi adí ca discípuluá: Lítsa' lani e para qui'ni gatti hua ri'u lani e.

<sup>17</sup>De bitsina' Jesús nía nna, chilà uccua tappa ubitsa bigàttsi' Lázaruá. <sup>18</sup>Yetsi Betania nna ri'á èxabá Jerusalén ttu tsal'ue' legua tì'ga. <sup>19</sup>Nuŷetse' ca judíua nna biria çà le' Jerusalén nna huía çà litsi' María nna Mártaá nna para éyue' çà çà la'ŷeni porqui'ni gùtti dana caniá. <sup>20</sup>Bina bá Mártaá qui'ni dia Jesús litsi' caniá nna, biria chià para tatts'a' ne; pero María nna beyà'na bá le' yú'u. <sup>21</sup>Mártaá nna ra tià Jesús: Señor, cáalá re' ba cuià'lu' ni nna, entonces labí gùtti dana ya' a. <sup>22</sup>Pero hua yú huá' qui'ni biŷa tediba inàbani cuià'lu' Tata Dios lani oración nna, lèe nna gunie na. <sup>23</sup>Jesús nna rèe na: Hueyátha

bá dana lu'a de lo lù'uti. <sup>24</sup>Mártaá nna rà ne: Hua yua' qui'ni eyátha dana ya' a canchu chi gal'la' último tsáa nna eyatha huá iyaba canu yatti de lo lù'uti. <sup>25</sup>Jesús nna rèe na: Inte' rechítha'a' ca enne' de lo lù'uti, à'hua ná' la'labàni nna. Nu ríalatsi'ì inte', màsqui'ba chi gùttià nna ccabàni bá, <sup>26</sup>à'hua iyaba ca enne' bàni canu ríalatsi' qui' inte' nna, para siempre ni labí gatti çà. Tsí hua ríalatsi' lu' nui. <sup>27</sup>Becàbi Mártaá nna rà ne: Señor, hua ría bá látsa'a' qui'ni cuià'lu' Enni'a Cristo Ŷi'ni Tata Dios, chi gul'lani cuià'lu' yétsiloyu.

<sup>28</sup>Beyacca bá ra Mártaá anía nna, huía tatàyi gàttsi' bá ŷilí María nna rà na: Nì du Maéstruá nna rinnie lu'. <sup>29</sup>Biyeni báni María nu ra Mártaá nna, guduli chià quètha taaní nna huía ru'a lo Jesús. <sup>30</sup>Jesús nna du bée làti tatts'a' Mártaá néa, labí chi gutè'e le' yétsiá. <sup>31</sup>Ca enne' judío tsè'e litsi' María reyue' çà na la'ŷeniá, pues làcà nna bilá' báni çà qui'ni quèthaní gudulí María nna, acca biria tehuá çà denó çà na, nna ra çà: Gubètsi bá díà lo bàá. <sup>32</sup>Bitsina' bá María làti du Jesús nna, de bila'nià ne nna bedu tè ŷibi ru'a lúe nna rà ne: Señor, cáalá re' ba cuià'lu' nì nna, labí gutti dana ya'a. <sup>33</sup>Jesús nna bilá' banie na qui'ni ribetsià à'hua ca enne' judío canu dia lani naá ribetsi huá çà nna, acca yala triste uccuani latsi'e nna gunnení latsi'e. <sup>34</sup>Ra tiè: Gání gutíxa li à. Becàbi çà nna ra tè çà ne: Gutà tsáruhuá inna' cuià'lu'. <sup>35</sup>Guretsi tè Jesús. <sup>36</sup>Acca ra tè ca judíua: Hualigani yala uccuani bi à. <sup>37</sup>Ttu te çà nna ra çà: Là nna

guthàliq̄ iyyaló nu uccua ciéguá, tsí làa uccua huániq̄ guniá qui'ni bittu gatti Lázaruá ca.

<sup>38</sup>Jesús nna fuérteni gunne latsi'e attu de bitsine'e ru'a bàá. Ttu bèlia bá ná nuá nna yáya tè rúlj̄ lani ttu íyya xeni tsè'. <sup>39</sup>Jesús nna ra tie: Líccua íyya!. Marta dana enne' gùttia nna r̄a ne: Señor, chi ril-là'q̄ porqui'ni chi uccua tappa ubitsa bigàttisì'q̄. <sup>40</sup>Jesús nna rèe na: Tsí álahua chi nia' lu' qui'ni canchu tsíalatsi' lu' nna, hualá'ni lu' la'huacca qui' Tata Dios. <sup>41</sup>Làniana gutù'a c̄a íyyaá de làti bigattsi' muértuá. Jesús nna guchitha tè lúe rá' nna benie oración lani Tata Dios nna rèe: Tata quia', quiȳarú cuiq̄'lu' qui'ni chi biyeni cuiq̄'lu' oración quia', <sup>42</sup>hua yú bá' qui'ni siempre ni rudà naga' cuiq̄'lu' quia'; pero nia' nui para qui'ni ca enne' ȳtése'nì tsè'e ìta'lùba nì nna ilá'ni c̄a nna tsíalatsi' qui' qui'ni cuiq̄'bálu' guthel-la' cuiq̄'lu' inte'. <sup>43</sup>Beyacca rèe anía nna, gunnie iditsani nna rèe: Lázaro, beria fuera. <sup>44</sup>Làniana nu yàttia nna beria chiq̄ tésis lári' ca nì'a ní'j̄, túbì tè lúj̄ ttu lári'. Jesús nna ra tie c̄a: Lethàtsi q̄ nna, líhue'él-la' tì q̄ éyya.

<sup>45</sup>Làniana nuyetse' ca enne' judíua canu beni c̄a María acompañar nna bilá' bání c̄a milagro nu beni Jesús nna huíalatsi' qui' ne. <sup>46</sup>Pero attu te c̄a nna huía c̄a ru'a lo ca fariséua nna gutixà'a c̄a nu beni Jesús. <sup>47</sup>Làniana ca sacerdote principal lani ca fariséua nna gunne tè c̄a ru'a lo Junta Suprema qui' ca enne' judíua nna ra c̄a: Biani ína le guni ri'u, porqui'ni nubéyu'j̄ nna nuyetse' ca milágrua

runiá, <sup>48</sup>canchu hue'él-la' bá ri'u q̄ qui'ni guniá q̄', entonces prontu tabá iyaba ca enne' nna tsíalatsi' qui' na, làniana huàl-lani taá ca soldado da' de Roma nna gutappa' c̄a templo qui' rí'uaq̄, q̄'hua gul-lù'ya c̄a latsi' nación qui' rí'uj̄ nna. <sup>49</sup>Làniana de lo iyaba canu tsè'e nía nna gudulí ttu nu láq̄ Caifás, uccuq̄ huexána' qui' ca sacerdote qui' ida lànìa. Lq̄ nna gunniq̄ nna r̄a: Lebi'i nna, labí bi'ya yù le, <sup>50</sup>nìdi làa rulaba latsi' le qui'ni adila tsa' tal-liq̄ ri'u canchu gatti ttu enne' por yetstì tì'ca'la l-lù'ya tebá latsi' ituba nación qui' rí'uj̄. <sup>51</sup>Anía r̄a, pero alàa por la' rulábalatsi' qui' bíj̄, sino porqui'ni uccuq̄ huexána' qui' ca sacerdotèa ida lànìa nna gunniq̄ parte Tata Dios qui'ni Jesús nna ná qui'ni gattie en vez de ituba nación qui' ca enne' judío. <sup>52</sup>Pero alàa tsua' teruba por làc̄a gattie sino q̄'hua para eyúnìe ttùba iyábani ca ȳi'ni Tata Dios canu nàthilàlia bá le' ituba yétsiloyu. <sup>53</sup>Acca dèsdeba lànìa nna gutsé'e c̄a de acuerdo para gutti c̄a Jesús. <sup>54</sup>Acca lèe nna labiru gurènie dacca'ló tè entre ca judíua, sino bede'e nía nna huíe para región luítta' desiéruá le' ttu yetsi láq̄ Efraín. Nía bá gùdue lani ca discípulo qui'áa. <sup>55</sup>Chì' tegáabá debiga' pascua qui' ca enne' judíua nna, nuyetse' ca enne' qui' ca yetsi to' anta' nía huía c̄a Jerusalén ántesca gal-la' fiéstaa para eyacca nàrì c̄a según costumbre religiosa qui' qui'. <sup>56</sup>Làc̄a nna beyìla c̄a Jesús. Acca de tsè'e c̄a le' templua nna gunàba titsa' luetsi qui' nna ra c̄a: Biani ra le. Tsí bihua itá fiéstì cá. <sup>57</sup>Ca sacerdote principal q̄'hua

ca fariséua nna gunèni cą ca enne' qui'ni nuŷa tediba guną gaŷa ri'e nna, ná qui'ni equixá'a taá cą, para qui'ni gudàxu' cą ne preso.

**12** Xuppa ubitsa ántesca gal-la' pascua nna, huía Jesús Betania làti gùdua Lázaro nu gùttia pero Jesús nna bechithèe na de lo lù'uti. <sup>2</sup>Nía nna beni cą sí'e; Mártaá nna runi tią servir lo méyá. Entre canu ŷuaní lo méyáá lani Jesús nna, re' huá Lázaruá nía. <sup>3</sup>Làniana guŷi' María ttu frasco tá'a lì'i ttu medio kilo puru taá unguento nu de iyyà láą nardo dàcca'a' yaŷi nna bedua tią cą lani ittsa' iquŷi. Bètu taá le' yú'a gul-làa' iŷíxí. <sup>4</sup>Ttu discípulo qui'áa nu ná qui'ni gutiá ne cuenta láą Judas Iscariote ŷi'ni ttu nubeyu' láą Simón, gunnią nna ra: <sup>5</sup>Bianicca làa huatsitò'o lá unguéntua' por tsunna gayua' denario nna guni ri' u cualàni ca enne' rittè la'dí'. <sup>6</sup>Anía ra, pero álahua qui'ni yala retúa latsi'i ca enne' pobre, sino porqui'ni ubàna bá uccua, a'hua labá nàl-la' bolsa bel-liu nu bitúppá qui' cabía nna. <sup>7</sup>Jesús nna ra tè Judas: Be'èl-la' bá a, porqui'ni para canchu chi gal-la' tsá igàttsi'a', acca runiá nui, <sup>8</sup>pues, ca enne' pobre nna tulidàba tsè'e cą lani le, pero inte' nna álahua tulidà renia' lani le.

<sup>9</sup>Làniana nuŷetse' ca enne' judíua bina cą qui'ni re' Jesús nía, acca huía cą, aláa tsua' teruba por Jesús sino para qui'ni ilá' huáni cą Lázaro nu benie qui'ni beyàcca bàni naá. <sup>10</sup>Acca ca sacerdote principal nna gunne lettia cą gutti hua cą Lázaruá, <sup>11</sup>qui'ni por Lázaruá nna nuŷétse'ní ca judíua bétse'e latsi' quŷi religión fariséuá nna huálatsi' quŷi Jesús.

<sup>12</sup>Attu yu'utsá nna míli' ní ca enne' tsè'e cą fiéstaá qui' Jerusalén. Biyeni báni cą qui'ni chi dia Jesús nía nna, <sup>13</sup>guchu cą ca ná' ca ya dina' nna, biria cą para tatsà' cą ne, gunne tè cą idítsa tsè' nna ra cą: Quiŷarú Tata Dios. Bendito enne' da' por mandado qui' Señor Dios para quée Rey qui' yetsi qui' ri' u Israel. <sup>14</sup>Gul-lani Jesús làti du ttu burro to' nna, gutsia tiè na, ti'ba chi ga'na escrito nu cca qui'e làti ra:

<sup>15</sup>Lebi'i ca enne' qui' yetsi Sión, bittu gátsini le;  
Linna' tsáruhuá, nì da' enne' cca Rey qui' le.  
Tsie ttu burro to'.

<sup>16</sup>Primérute nna labí gutéelíni ca discípulo qui'áa nu uccua tsá lània, pero bitola de chi deyya Jesús ŷiabara' para thí'e la' dálliani nna, lànialá nna bexa latsi' cabi qui'ni iyaba ca cosa nna chi ga'na cą escrito nu cca qui'e, a'hua qui'ni anía ná qui'ni ttíe. <sup>17</sup>Ca enne' tsè'e lani Jesús loti' beyàŷie Lázaruá beria' le' yerubàa nna benie qui'ni beyàcca bànią, pues làcą nna bedàa cą titsa' acerca de nu uccua. <sup>18</sup>Acca nuŷè tsè'ni ca enne' huía huá cą tatsà' cą Jesús, qui'ni biyénini cą testimonio qui' ca enne' qui'ni Jesús nna benie milágrua. <sup>19</sup>Acca ca fariséua nna ra luetsi quŷi: Hua ruyu ba le qui'ni labí biŷa tálíą ri' u alá. Línna'áruhuá qui'ni iyáŷiani ca enne' ritanó cą na.

<sup>20</sup>Tsè'e tè tuchuppa ca enne' griego entre canu huía huèni adorar loti' gùl-la' fiéstaá. <sup>21</sup>Làcą nna bitsina' cą ru'a lo Felipe enne' yetsi Betsaida estado qui' Galilea nna, gutta'yúni cą bi nna ra cą: Señor,

calatsi' tu' ila'ni tu' Jesús. <sup>22</sup>Huía tètè Felípea tatixà'ani bi Andrés; làniana Andrés lani Felípea nna gutixa'áni cabí Jesús. <sup>23</sup>Becàbi Jesús nna rèe cabi: Chi gul'laní tiempo nu ná señalado qui'ni Nubeyu' de Ýiabara' nna thí'e la' dàliani. <sup>24</sup>Hualigani te' riquixa'ánia' le: Canchu ttu ÿua'xtíla labí tsu'á liu'u yú para eyáttsa, pues turuba ná tulidàba. Pero canchu gattià nna, entonces iÿeni lena' gunnà. <sup>25</sup>Nuÿa tediba catsi'ínià la'a labá nna pues lã nna nittiã. Pero nuÿa tediba labí nùyue cania por la'labàni qui'ì miéntraste duã le' yetsiloyuì nna, lànuá nna runiã preparar por ttu la'labàni nu labí ttíã qui'ì. <sup>26</sup>Canchu nuÿa calatsi'ì ccã siervo quia' nna, té qui'ni tanúã inte'; a'hua làti thua' nna, nía huá thua siervo quíya'a. Nuÿa runiã inte' servir nna, seguru ba rudàliani Tata quíya'a na.

<sup>27</sup>Tsi'irúbani cani latsi' lóstu'a'. Annana, biani inia' cá. Tsi' inia': Tata Dios, bedilà cuiã'lu' inte' de ca sufrimiento nu da' lo yì'ì. Pero por nui lá daya' yétsiloyu. <sup>28</sup>Tata Dios quia', belue' cuiã'lu' le' yétsiloyu qui'ni ná cuiã'lu' enne' ÿeni, para qui'ni gudàliani cã cuiã'lu'.

De ra Jesús anía nna, biyeni tètè ttu tsì'i de ÿiabara' nna rèe: Chi belu'í'a' qui'ni ná' enne' ÿeni, a'hua chi' gulue' huá ya' a' attu. <sup>29</sup>Biyeni bání ca enne' ÿétse'nía tsì'i Enne' gunnea nna pero ra la cã: ídiu' bá nuã'. Attu te cã nna ra cã: Ttu ángel gunèni bi a. <sup>30</sup>Jesús nna ra tètè cã: Álahua por inte' acca gul'laní tsì'i Enne' gunnea sino por lebi'i ba para qui'ni tsíalatsi' le, <sup>31</sup>annana

chi gùl-la' tiempo para cca juzgar yétsiloyu; a'hua annana nu ná príncipe qui' yétsiloyuì nna irù'na fuera. <sup>32</sup>Canchu chi ichitha cã inte' de loyu nna, làniana gunia' qui'ni iyaba ca enne' nna ccã cã sentir la' tsì'ilatsi' quia' por làcã. <sup>33</sup>Anía rèe para ttélini ti'íÿa la modo gattie. <sup>34</sup>Becàbi ca enne' nna ra cã ne: Chi biyénini tu' nu ra lo ley qui'ni Cristua nna tulidàba bànie. Bialacca ra lu' qui'ni Nubeyu' de Ýiabara' nna caduel-la' ichitha cã ne cá. Núní nua' Nubeyu' de Ýiabara' nì'i. <sup>35</sup>Becàbi Jesús nna rèe cã: Por attu tiempo xcuichu to' teruba du enne' ná la'yani' entre lebi'i. Acca lebi'i nna lítha' le' la'yáni'ì miéntraste dùe lani le, para qui'ni bittu gudàxu' la' chul-la le nìyya latsi' le, porqui'ni nu rida' le' chul-la nna labí yùl gaÿa díã. <sup>36</sup>Daca'tè du la'yani' lani lebi'i nna, lítsía latsi' le qui'e para qui'ni ccã le enne' qui' la'yani'.

Beyacca bá gunne Jesús ca tìtsa'a nna, bede'e nía nna labiru bila'ni cã ne. <sup>37</sup>Pero màsqui'ba bila'ni cã iÿetse' ca milagro nu benie, pero labí huíalatsi' quì ne. <sup>38</sup>Anía modo nna uccua cumplir ca tìtsa' qui' Isaías enne' uccua profeta, loti' ra bi:

Señor, núní chi huíalatsi'ì ca tìtsa' nu riquixá'a tu' cá.

Lani núní chi belue' Señor la'huacca quì'e cá.

<sup>39</sup>Razón porqui'ni labí huíalatsi' quì, pues la'a mísmuba Isaías nna raáruhuá bi:

<sup>40</sup>Tata Dios nna benie qui'ni làa ila'ni cã.

A'hua gulèqquia chul-la telée la' riyeni qui' quì;

Para qui'ni làa ila'ni ca, ñihua  
làa ttélini ca nna,  
Ñihua làa eyeqquia ca lani e  
para eyunie ca.

<sup>41</sup>Ca títisa'a gunne Isafás loti' bila'ni  
bi la'yani' bàni qui' Señor.

<sup>42</sup>Pero siempre ba nuÿetse' ca  
enne' judíua nna huíalatsi' qui'  
Jesús, hàstaá tuchùppa canu  
rigú'ubia' qui' caniá nna huía huá  
latsi' qui'. Pero porqui'ni gùtsi báni  
ca gudàl-la ca fariséua ca fuera  
sinagoga qui' caniá, acca labí  
belue' ca qui'ni huíalatsi' qui' Jesús,  
<sup>43</sup>porqui'ni adila guyú'u latsi' qui'  
gudàliani ca enne' ca tì'ca'la la'  
dàliani nu runna Tata Dios.

<sup>44</sup>Gunne Jesús idítsa nna rèe:  
Nu ríalatsi'ì inte' nna, álahua  
tsua' teruba inte' ríalatsi'ì sino  
ría huá latsi'ì enne' guthel-le'e  
inte'. <sup>45</sup>Nu rila'niá inte' lani fe  
nna, rilá' huániá enne' guthel-le'e  
inte'. <sup>46</sup>Inte' ná' la'yani' gul-lania' le'  
yétsiloyu, para qui'ni nuÿa tediba  
ríalatsi'ì inte' nna labiru cueniá  
le' chul-la. <sup>47</sup>Nuÿa riyénini ca títisa'  
quíyi'ì, pero labí rigua ca lo lòstu'ì  
nna, pues álahua inte' cueqquia'  
sentencia qui'ì porqui'ni labí daya'  
ubèqquia sentencia qui' ca enne',  
sino para qui'ni iyaba ca enne' nna  
ccá ca salvo. <sup>48</sup>Nuÿa rutsibiá inte'  
ñihua làa ríalatsi'ì ca títisa' qui'yi'ì  
nna, pues tébá nu guniá na juzgar,  
quiere decir qui'ni méruání ca  
títisa' nu rinnía' nna ná nu guniá na  
sentenciar canchu chi gal-la' último  
tsá. <sup>49</sup>Porqui'ni inte' nna labí rinnía'  
según la' rulábalatsi' quíba', sino  
Tata Dios enne' guthel-le'e inte' nna  
benie inte' mandado nu ná qui'ni  
íní'a'. <sup>50</sup>Yúlfrania' qui'ni enseñanza

qui' Tata quiya'a nna ná para gata'  
la'labàni nu labí ttíq qui' ca enne'.  
Acca nu rinne yì'ì nna ná según bá  
nu chi ra Tatáa inte' qui'ni quíxa'a'.

**13** Antesca gal-la' fiesta  
qui' ca enne' judíua láa  
pascua, hua yù ba Jesús qui'ni chì'  
taáduq gal-la' hora qui'e para éde'e  
yétsiloyu' nna éyyee làti dua Tatáa.  
Pero tulidàba uccuatsi'ínie ca enne'  
qui'áa tsè'e cabi le' yétsiloyu, a'hua  
belui'e ttu prueba nu adí teerulá  
xeni qui'ni hualigani uccuatsi'ínie  
cabi. <sup>2</sup>Numalua nna chilá beniá  
latsi' Judas Iscariote ÿi'ni Simón  
qui'ni gutiá Jesús cuenta para  
gattie. <sup>3</sup>Pero hua yù bá Jesús qui'ni  
chi bete Tatáa làtsi' néle iyábani ca  
cosa; hua yù huée qui'ni birie làti  
dua Tata Dios, níahuá éyyee. <sup>4</sup>De  
chi gutò sé' cabía nna gùduli tìe  
lo méÿaá nna gutue capa qui'áa  
nna guÿi' tìe ttu toalla nna beteé'e  
na ru'a lúeá. <sup>5</sup>Làniana gùte'e inda  
le' ttu ttsá' nna gùdulue rìe nì'a  
ca discípulo qui'áa, bedibìtsi tìe  
ca lani toalla nu dùni ru'a lúeá.  
<sup>6</sup>Bitsina' bée làti re' Simón Pedrua  
nna, ra tè Pedrua ne: Señor, tsí  
cuiq'lálu' qui' ca nì'a' cá. <sup>7</sup>Becàbi  
Jesús nna rèe bi: Nu runi yì'ì nna  
labí ritelíni lu' a' anna, pero bitola  
nna hua ttelí báni lu' a'. <sup>8</sup>Pedrua  
nna ra tè bi e: Jamás labí qui'ì  
cuiq'lu' ca nì'a'. Becàbi Jesús nna  
rèe bi: Canchu labí hue'él-la' lu'  
inte' qui'ì' ca nì'a' lu' nna, entonces  
labí cuenta cue' ba lu' lani inte'.  
<sup>9</sup>Simón Pedrua nna ra bi e: Señor,  
guti' cuiq'lu' aláa tsua' teruba ca  
nì'l ', sino tsa'tsela tehuá ca nàya'  
nna iququia' nna. <sup>10</sup>Jesús nna rèe bi:  
Nu ná bá nàrì nna labí riquína'niá

tsárią attu, sino quí teruba ca nì'į, pues itubą ná nàrì. Lebi'i nna chi ná le nàrì, màsqui'ba alàa iyá le. <sup>11</sup>Anía rèe porqui'ni hua yù bée nuỹa nuá gutiạ ne cuenta làtsi' ná' canu labí cca guyu cạ ne, acca rèe: Álahua iyá le ná nàrì. <sup>12</sup>Beyacca bá gutiie nì'a cabi nna, beyàccu'e capa qui'áa nna, bedúáníe lo meỹa nna rèe cabi: Tsi hua ritelíni le enseńanza bíyacca benia' nui cá. <sup>13-14</sup>Lebi'į nna reya le inte' Maestro nna Señor nna; labá ná nu rena le porqui'ni hualiba ná' Señor nna Maestro nna, atsi'íni chi gutiía' ca nì'a le. A'hua lebi'i nna dà huáni le quí nì'a luetsi le. <sup>15</sup>Nu beni yì'į nna ną ttu ejemplo para lebi'i. Tì'ba inte' chi benia' le servir nna, a'hua liguni servir luetsi le. <sup>16</sup>Hualigani te' riquixa'ánia' le: Ttu siervo nna labí ną adí enne' yēni tì'chu xana' niá, a'hua nu dia mandádua nna labí ną adí enne' yēni tì'chu enne' guthel-la' bi ạ. <sup>17</sup>Chi hua yù bá le ca cosį nna, icca'rubà le canchu guni le cạ. <sup>18</sup>Álahua por iyaba le nia' nui, porqui'ni hua nabia' bá te' canu chi becuí'a'. Pero hua té ttu Escritura nu ná qui'ni ccá cumplir nna ra: Nu ro lani ya'a nna runiạ ti'atsi ną amigo quia', pero guni lą contra inte'. <sup>19</sup>Riquixx'ánia' le nui con tiempo ántesca íl-lani hora ccạ cumplir, para qui'ni canchu chi ccạ cumplir nna tsíalatsi' le qui'ni hualiba te' nu chi nia' le acerca de inte'. <sup>20</sup>Hualigani te' nia' le: Nu guniạ recibir mensajero ithél-la'a' nna, ti'átsi inte' bá nuá guniạ recibir; a'hua nu guniạ inte' recibir nna, guni huá recibir enne' guthel-le'e inte'.

<sup>21</sup>Beyacca bá ra Jesús anía nna, tsi'íru' bání uccuani latsi'e nna benie declarar nna rèe: Hualigani te' riquixa'ánia' le qui'ni nuỹa lá ttu le nna gutiạ inte' cuenta para gattia'. <sup>22</sup>Làniana gùdulo ca discípu'luá gunna' lo luetsi cabi, belaba latsi' cabi qui' núdi'ló cabi nuá rèe anía. <sup>23</sup>Ttu discípu'lo nu yala uccuatsi'íni Jesús nna rē'ni bi exa taá cuítte' e lo meỹa. <sup>24</sup>Làbi nna benìni Simón Pedrua seña para inàba titsa' bi Jesús nuỹa quí nuá rèe anía. <sup>25</sup>Làbi nna guxua tè iquua bi yìquua Jesús loti' bila'ni bi seña nu beni Pedrua nna ra bi e: Señor, núní nua' guniạ contra cuiạ'lu' lani la' ruthacca'yí cá. <sup>26</sup>Becàbi Jesús nna rèe: Nu huí'a' ettaxtíla bitha nna, lą nuá. Làniana Jesús nna bedibitha tìe ettaxtílaá nna bì'e Judas Iscariote yì'ni ttu nubeyu' lą Simón. <sup>27</sup>Guỹi' díbá Judas ettaxtílaá nna, guta'a tehuá Satanás lo lòstu'į. Jesús nna ra tìe Judas: Bè' taá latsi' lu' beni nu calatsi' lu' guni lu' ạ. <sup>28</sup>Pero nì ttúhuá ca discípu'lo yuàni lo meỹa nna labí gutéelíni cabi bíyacca rèe na anía. <sup>29</sup>Yà'ni qui'ni Judas ba dēni bolsa bēl-liuá, acca ttu te cabi nna belaba latsi' cabi qui'ni Jesús nna rèe na qui'ni tsía xiạ tayò'ạ nu riquína'ni cabi para fiésta, o, qui'ni gute tí'ạ para ca enne' pobre. <sup>30</sup>Acca de chi gutò Judas Iscariótea ettaxtílaá nna, luegu taá biria. Chi uccua yèlè làniana.

<sup>31</sup>Biria díbá Judas, làniana ra Jesús: Annana Nubeyu' de Yíabara' nna thí' bi la' dàliani, a'hua Tata Dios nna thí'e adí la' dàliani por iyaba nu ná qui'ni tté bí. <sup>32</sup>Canchu



Tata Dios nna ridi'e adí la' dàliani por medio de nu runi Yí'nie, entonces Tata Dios nna gudàliani huée bi lani la'huacca quì'e, luego taá gunie na. <sup>33</sup>Lebi'ì, yì'ni to' quia', áti'to' teruba reyàtsa, làniana lanúrua' thu lani le. Hueyìla inte' ba guni le, pero tì'ba chi pá'a' ca judíua a'hua nia' le anna: Làti éya'a' nna, labí ccani le ìta le. <sup>34</sup>Ttu mandamiento cubi rinénia' le qui'ni guni le: Ligàppa la' tsì'ìlatsi' luetsi le. Tì'ba inte' chi uccuatsi'í te' le, a'hua lebi'ì nna dàni le catsi'íni luetsi le. <sup>35</sup>A' modo nna ennia iyaba ca enne' cuenta qui'ni ná le discípulo quia', canchu hualigani gulue' le qui'ni té la' tsì'ìlatsi' lo losto' le lani ttu le nna para attu le nna.

<sup>36</sup>Simón Pedrua nna ra bi e: Señor, gani éyya cuià'lu'. Jesús nna ra tie bi: Làti éya'a' nna, labí ccani lu' tanó tè lu' inte' anna, pero bitola nna ìta lu' lani inte'. <sup>37</sup>Pedrua nna ra bi e: Señor, bianicca làa tanó tia' cuià'lu' anna nì'i. Pues iria taá látsa'a' la'labàni quia' para gattia' por cuià'lu'. <sup>38</sup>Becàbi Jesús nna rèe bi: Tsí hualigani ga'na lu' dispuesto gatti lu' por inte' cá. Pero inte' nna nia' lu': Tsunna vuelta gúnìlatsi' lu' nna ína lu' qui'ni labí nabia'ni lu' inte', làniana cuetsi xcurúdiá.

**14** Bittu echùl'la latsi' losto' le. Ná qui'ni tsíalatsi' le Tata Dios, pero lítsía huá latsi' le inte'. <sup>2</sup>Le' litsi' Tàta quí'a nna yala nettia. Cálá álahua á' ná nna, chilà gutixa'ánia' le cá. Annana éya'a' huèni preparar lugar para lebi'i. <sup>3</sup>Éya'a' huèni preparar lugar para lebi'i, lànialá ìta' attu ta'ya'

le, para qui'ni làti thú'a', lebi'i nna tsé'e huá lé. <sup>4</sup>Hua yù bá le ga'ya éya'a', hua nabia' huáni le néda nna. <sup>5</sup>Tomás nna ra tè bi e: Señor, labí yù tu' ga'ya éyya cuià'lu'. Tì'ala modo gunibia' tu' néda cá. <sup>6</sup>Jesús nna rèe bi: Inte' ná' neda, a'hua nu lígani nna la' labàni nna. Ni ttu enne' lanú ccani itá ru'a lo Tata Dios sino là teruba por inte'. <sup>7</sup>Canchu hualigani nabia'ni le inte' nna, entonces chi nabia' huáni le Tata quí'a. Dèdsaba anna chi nabia'ni le Tatáa, chìhuá rila'ni li e nna. <sup>8</sup>Felípea nna ra bi e: Señor, belue'ni cuià'lu' intu' Tatáa para qui'ni ca'yen taá latsi' tu'. <sup>9</sup>Jesús nna rèe bi: Felipe, chi gutsánì nui renia' lani le, tsí bihua chi nabia'ni lu' inte' cá. Nu chi bila'nià inte' nna chìhuá bila'nià Tatáa. Bíálacca ra lu': Belue'ni intu' Tatáa cá. <sup>10</sup>Tsí bihua ríalatsi' lu' qui'ni inte' nna ná' ttùba lani Tatáa a'hua lèe lani inte' nna. Ca titsa' nu rinénia' le nna labí rìnne ya' ca por la' calatsi' quí'bá', sino Tata quia' enne' dua lo lóstu'a', làbe runi ca così. <sup>11</sup>Lítsía latsi' le quia' qui'ni ná' ttùba lani Tatáa a'hua Tatáa nna dúe lo lóstu'a'. Pues màsqui'di lítsía latsi' le inte' por la'a mísmuba ca obra tsè' nu runia'. <sup>12</sup>Hualigani te' riquixa'ánia' le: Nu'ya tediba ríalatsi'ì inte' nna, pues lã nna guni huá ca hecho nu runia'; a'hua adí telá ca tsina tsè' nu gulue' la'huacca quia' guniã, porqui'ni inte' nna éya'a bá' làti dua Tatáa. <sup>13</sup>A'hua iyate nu inàbani le Tatáa lani nombre quia', pues inte' nna guni ya' a para qui'ni Tatáa nna thí'e adí la' dàliani por nu runia', porqui'ni ná' Yí'nie. <sup>14</sup>Bi'ya

diba inàba le lani nombre quia' nna, seguro ní inte' nna guni bá ya' a.

<sup>15</sup>Canchu catsi'íni le inte' nna, pues liguni nu ra ca mandamiento quíyí'í. <sup>16</sup>Inte' nna inábania' Tatáa para ithl-le'e attu enne' gunna la'yeni lo losto' le, para qui'ni thúe lani le tulidàba. <sup>17</sup>Née Espóritu Santo enne' gulue'nie le adí nu ná lí, pero yétsiloyu nna labí guniá ne recibir porqui'ni labí rila'niá ne, ñihua labí nabia'niá ne. Pero lebi'i nna hua nabia'ni li e porqui'ni dùe lani le a'hua thúe lo losto' le nna. <sup>18</sup>Labí guthá'na' le huídàbi, ìta' attu por lebi'i. <sup>19</sup>Áti'to' teruba reyàtsa nna labiru ila'ni yétsiloyu inte'; pero lebi'i nna ilá' báni le inte' attu; porqui'ni tulidàba bània', acca a'hua lebi'i nna ccabàni le. <sup>20</sup>Làniiana gunibia' le qui'ni inte' nna ttùba ná' lani Tata quíya'a, a'hua lebi'i lani inte', inte' lani le nna. <sup>21</sup>Nuḃa tediba nabia'niá ca mandamiento quíyí'í nna rigua çá nna, lã nna rului'ã qui'ni hualigani catsi'íniá inte'. Nu catsi'íniá inte' nna, entonces Tata quí'a nna cátsi'í huánie na; a'hua inte' yala cátsi'í ti' a nna ccá' declarar lani a. <sup>22</sup>Làniiana ra tè Judas ne (pero alàa Judas Iscarióteá): Señor, ti'ani modo acca ccá cuiã'lu' declarar lani tsaã' intu' teruba, pero lani yétsiloyu nna bihua ñi'i. <sup>23</sup>Becàbi Jesús nna rée bi: Nu catsi'íniá inte' nna, lànua rigua ca titsa' quia'; Tata quíya'a nna yala catsi'ínie na, ìta tu' nna ccá tu' ttùba lani a. <sup>24</sup>Nu labí catsi'íniá inte' nna, pues ñihua labí runiá obedecer ca titsa' quia'. Ca titsa' nu chi biyénini le nna álahuá ná çá quia', sino qui' Tata

quí'a enne' guthel-le'e inte'. <sup>25</sup>Ñi riquixa'ánia' le ca cosí miéntraste reniírua' lani le. <sup>26</sup>Pero Tatáa nna ithèl-le'e Espóritu Santo para gunie vez quia' nna gúnnée la'yeni lo losto' le nna gunie qui'ni ttelíni le iyaba ca enseñanza nu cca qui' Tata Dios, a'hua gurèxee latsi' le iyate nu chi gutixa'ánia' le. <sup>27</sup>La'yeni ruthá'na' lani le, la'yeni quia' runna' lani le, alàa luetsi la'yeni nu runna yétsiloyu. Bittu echùl-la latsi' losto' le, ñihua làa gátsini le. <sup>28</sup>Chi biyénini le qui'ni nia': Éya'a', pero ìta' attu. Canchu hualigani catsi'íni le inte' nna, entonces edacca' láni le qui'ni nia' éya'a' làti dua Tatáa, porqui'ni Tatáa nna adiru la'huacca té quí'e tì'chu inte'. <sup>29</sup>Annana chi gutixa'ánia' le nui con tiempo ba ántesca íl-lani hora qui'ni ccá cumplir, para qui'ni canchu chi ccá cumplir nna éxalatsi' le ca tìtsi'í nna gappa le confianza lani inte'. <sup>30</sup>Bíruhuá innée tegá' lani le, porqui'ni chi debiga' nu ná príncipe qui' yétsiloyu, pero lani inte' nna labí derecho té quí'í. <sup>31</sup>Pero para qui'ni yétsiloyu nna gunibí'ã qui'ni catsi'í te' Tatáa, acca runi ba' conforme lani nu chi gunènie inte'. Lédúulí, léya'a'.

**15** Inte' nna ccà'a' comparar tì'a ttu planta betsulí' nu hualigani runna fruto tsè'. Tata quíya'a nna née enne' runie na tsina. <sup>2</sup>Iyaba ca ná' plantí nu labí ribia lo quí nna, ichèccu'e çá. A'hua iyaba nu runna fruto nna, rutsíppee çá para qui'ni gunna çá adí fruto. <sup>3</sup>Lebi'i nna chia ná le nàri por ca titsa' nu chi gunénia' le. <sup>4</sup>Liguni seguir tsè'e le ttùba lani inte', a'hua

inte' lani le nna. Tì'a ttu ná' tùbà betsulí' labí cuía lúj canchu labí nèl-la'niã lani tùbà qui'ì, ñihua lebi'i labí fruto gunna le canchu labí guni le seguir tsè'e le ttùba lani inte'.

<sup>5</sup>Inte' nna ccà'a' comparar tì'a tùbà betsulí', lebi'i ca nàya' nna. Nuỹa tediba runiã seguir ttùba lani inte' tì'a inte' lani ą nna, lànúa nna yala fruto runnã. Porqui'ni sin inte' nna, labí biỹa ccani le guni le. <sup>6</sup>Nu labí runi seguir lani inte' nna, irù'nã fuera tì'a ca ná' tùbà betsulí' canu chi gubitsi. Pues redi' tè ri'u ca yà bitsia nna rudàl-la ri'u cã lo yì'.

<sup>7</sup>Canchu guni le seguir lani inte', ą'hua ca titsa' quia' lo losto' le nna, línnaba iyate nu calatsi' le lani oración nna, huàccã. <sup>8</sup>Por nui nna dàliani Tata quíya'a, qui'ni ccá le tì'a ttu yà nu yala fruto runnã; anía modo nna hualigani ccá le discípulo quia'. <sup>9</sup>Ti'taání catsi'íni Tataa inte', ą' tehuá ná la' tsì'ilatsi' lo lóstu'a' para lani le. Liguni seguir lani la' tsì'ilatsi' quia' lo losto' le. <sup>10</sup>Canchu guni le nu ra ca titsa' quíy'i' nna, es qui'ni dua ba la' tsì'ilatsi' quia' lo losto' le; tì'ba inte' chi benia' nu gunèni Tataa quíya'a inte' nna, dua ba la' tsì'ilatsi' quì'e lo lóstu'a'.

<sup>11</sup>Ca così nna chi gunénia' le para qui'ni thua la' redacca' latsi' quia' lo losto' le, ą' modo nna labí biỹa la' redacca' latsi' ní eyàtsani le. <sup>12</sup>Nui nna nã nu calátsa'a' qui'ni guni le: Ligappa la' tsì'ilatsi' luetsi le tì'ba inte' uccuatsi'í te' le. <sup>13</sup>Lanú nuỹa té adí la' tsì'ilatsi' qui'ì tì'chu ttu enne' iria latsi'ì la'labàni qui'ì por ca amigo qui'ì. <sup>14</sup>Lebi'i nna ná le amigo quia' canchu guni le según bá nu rinénia' le. <sup>15</sup>Labiru épa'a' le

siervo, porqui'ni ttu siervo nna labí yùã ca la' rulábalatsi' qui' xana' niá. Sino chi ná ri'u ttùba amigo lo tsini, porqui'ni chi gutixa'ánia' le iyaba nu chi ra Tàta qui'a inte'. <sup>16</sup>Alàa lebi'ì becué' le inte', sino qui'ni inte' la becuí'a' le nna chi bedú'a' le qui'ni tsía le equixá'a le ca titsa' nu gunna fruto, ą'hua qui'ni resultado qui' tsina qui' le nna tulidàba gúchiã. A' modo nna iyate nu inàbani le Tataa lani nombre quia', lèe nna gúnnée na qui' le. <sup>17</sup>Nui nna rinénia' le: Qui'ni gulue' le qui'ni té la' tsì'ilatsi' lo losto' ttu le nna para attu le nna.

<sup>18</sup>Canchu chi ritè le ca prueba por la' ruyudí' qui' yétsiloyu, pues éxalatsi' le qui'ni yà'lá telá inte' beyudí'a. <sup>19</sup>Cáalá ná le ttùba lani yétsiloyu nna, entonces yétsiloyu nna yala catsi'íniã le ti'gálàa enne' qui'bì. Pero labí ná le ttùba lani yétsiloyu, sino qui'ni chi becuí'a' le le' yétsiloyu para ccá le enne' quia', acca yétsiloyu nna labí cca guyuã le. <sup>20</sup>Bittu iỹùl-lani le ca titsa' nu chi pá'a' le: Ttu huènutsina nna labí nã adí enne' ýeni tì'chu xana' niá. Chi rutsia latsi' qui' inte' nna, pues ą'hua lebi'i nna gutsia latsi' qui' le. Cáalá iyaba cã rigua cã ca titsa' quia', entonces ą'hua ca titsa' qui' le nna cúa huá cã. <sup>21</sup>Pero iyaba ca nui nna guthacca' cã le porqui'ni ríalatsi' le inte'; anía guni cã porqui'ni labí nabia'ni cã Enne' guthèl:le'e inte'. <sup>22</sup>Cáalá labí daya' yétsiloyu para inéni ya' cã, entonces labí lá tul-la' dà cã cá, pero annana labiru modo té para ína cã qui'ni bihua nabia'ni cã. <sup>23</sup>Nuỹa ruyudí'a inte' nna, ruyudí'

huá Tata quíya'a. <sup>24</sup>Cáalá labí benia' ca prueba de la'huacca lo quí canu nìdiruani ttu enne' lanú chi beni nna, entonces labí lá tul'la' dà ca. Pero chi bila'ni ca ca obra de la'huacca nu chi benia', atsi'íni ruyudí' lá ca inte', tsà'tsela tehuá Tata quíya'a ruyudí' ca nna. <sup>25</sup>Nui nna runiá cumplir nu chi ga'na escrito lo ley qui' quí nna ra:

Nìdi ttu falta labí té quia',  
atsi'íni labí uccua guyu ca  
inte'.

<sup>26</sup>Pero canchu chi íl'lani enne' ná Consolador ithél'la'a' de làti dua Tatáa nna, pues lèe nna gúnnee la'ÿeni lo losto' le. Enni'í nna née Espíritu Santo enne' ita por mandado qui' Tatáa nna íl'lanie le' yétsiloyu. Lèe nna innie titsa' lígani acerca de inte'. <sup>27</sup>A'hua lebi'i nna quixá'a huá le nu cca quia' porqui'ni tsè'e le lani inte' dèsdeba gùdulua' tsina quia' le' yétsiloyu.

**16** Rinénia' le ca cosí con tiémpubá, para qui'ni canchu íl'lani ca prueba lani le nna bittu ccá le apartar lo néda lígani.

<sup>2</sup>Porqui'ni labiru hue'él'la' ca le gá'a le le' ca sinagoga qui' quí. A'hua huà'lani tsá qui'ni canchu nuÿa diba guttiá le nna, gulaba latsi'í qui'ni anía modo nna runiá Tata Dios servir. <sup>3</sup>Iyaba ca nui guthacca' ca le porqui'ni labí nabia'ni ca Tata Dios ñihua inte' nna. <sup>4</sup>Pero dèsdeba anna riquixa'ánia' le ca cosí, para qui'ni canchu chi gal'la' hora nna entonces éxalatsi' le qui'ni chilà gutixa'ánia' le con tiempo.

Bihua gutixa'ánia' le nui dèsdeba neru, porqui'ni gùduba' lani le.

<sup>5</sup>Pero annana éya'a' làti dua enne'

guthèl'le'é inte'. Ni ttú huá le nna bihua inàba titsa' le inte': Gání éyya cuiá'lu'. <sup>6</sup>Pero yala triste cani latsi' losto' le porqui'ni chi pá'a' le ca cosí. <sup>7</sup>Riquixa'ánia' le nu ná lí taá, qui'ni para bien qui' ba le acca éya'a'; porqui'ni canchu labí éya'a' nna, entonces labí ita Enne' ná Consolador lani le. Pero canchu éya'a' nna, ithel'la' ye' e para thúe lani le nna gata' la'ÿeni lo losto' le. <sup>8</sup>A'hua canchu chi íl'lanie nna guluè'nie iyábani ca enne' qui' yétsiloyu qui'ni ná ca canu tul'la', a'hua qui'ni hua té ttu néda lígani para làca, a'hua qui'ni re' ttu castigo nna. <sup>9</sup>De ca tul'la', porqui'ni labí ríalatsi' quí inte'. <sup>10</sup>De lo néda lígani, porqui'ni inte' nna de edàya' ru'a lo le nna éya'a' ba' làti dua Tatáa ÿiabara'. <sup>11</sup>De juicio, porqui'ni numalua nna chi biria sentencia qui'í para tsíá castigo nna labiru cu'úbì'a' yétsiloyu.

<sup>12</sup>Iÿétse'éurulá ca enseñanza cca te' épa'a' le, pero anna tè nna labí ná le preparado para gúchia le ca.

<sup>13</sup>Pero canchu chi íl'lani Espíritu Santo entonces lèe nna íchi'e le adí lo néda nu ná lí; porqui'ni labí innie por nu cca qui'bée, sino qui'ni innie iyaba nu riyéninie; a'hua gunie qui'ni ccá le saber ca cosa nu chì' ccálá. <sup>14</sup>Anía modo nna gudàlianie inte', porqui'ni thí'e de nu ná quia' nna gunie qui'ni ccá li a saber.

<sup>15</sup>Iyaba nu té qui' Tatáa nna, quíbá' ná. Acca nia' qui'ni Espíritu Santo nna thí'e de nu ná quia' nna gunie qui'ni ccá li a saber.

<sup>16</sup>Chì' taáduá íl'lani hora labiru ila'ni le inte', pero áti'to' taá bitola nna ila'ni le inte' attu; porqui'ni

éya'a' làti dua Tatáa. <sup>17</sup>Làniara ra luetsi tuchùppa ca discípulo qui'áa: Biani nuà' rèe ri'u: Chi' taáduà ìl'lani hora labiru ila'ni le inte', pero áti'to' taá bitola nna ila'ni le inte' attu porqui'ni éya'a' làti dua Tatáa. <sup>18</sup>Acca ra luetsi cabi: Biani nua' rèe: Áti'to' teruba reyàtsa cá. Labí ritelíni ri'u biya qui'ní nua' rinnie. <sup>19</sup>Gutelí báni Jesús qui'ni uccua latsi' cabi inàba titsa' cabi e, acca rèe cabi: Tsí rinàba titsa' luetsi le acerca de qui'ni nia': Chì' taáduà ìl'lani hora labiru ila'ni le inte', pero áti'to' taá bitola nna ila'ni le inte' attu cá. <sup>20</sup>Hualigani te' riquixa'ánia' le qui'ni yala ehui'ni latsi' le nna cuetsi le, atsi'íni yétsiloyu nna edacca' lánià. Màsqi'ba yala triste ccáni le, pero la' rehuiní' latsi' qui' le nna eyacca lã la' redacca' latsi'. <sup>21</sup>Tì'a ttu niula nna, canchu chi ritsina' huatsa to' quì'i, pues yala dolor ràppà porqui'ni chi gùl-la' hora quì'i. Pero de chi té huatsa to' qui' niá nna, entonces labiru dá' latsi'i dolor qui' niá de tántua la' redacca' latsi' qui'ni chi gùlia ttu nító' le' yétsiloyu. <sup>22</sup>A'hua lebi'i nna, canchu anna cani triste latsi' le, pero hualá' bá te' le attu vuelta, làniara yala edacca' latsi' losto' le nna lanú nuya cúã la' redacca' latsi' de lo losto' le. <sup>23</sup>Làniara labiru biya inàba titsa' le inte'. Hualigani te' riquixa'ánia' le: Biya díba inàbani le Tatáa lani nombre quia' nna, gúnnee na qui' le. <sup>24</sup>Labí biya chi gunàba le lani nombre quia'; acca línnaba nna huadi' le, para qui'ni gata' iýeni la' redacca' latsi' qui' le.

<sup>25</sup>Ca enseñánzi nna chi gunénia' le por medio de comparación; pero

huàllani tsá canchu chi labiru inénia' le lani comparación, sino qui'ni directamente taá quixa'ánia' le nu cca qui' Tatáa. <sup>26</sup>Canchu chi i'yu tsáa nna, inàba le lani nombre quia', pero labí cáduel-la' gatta'yúnia' Tatáa por lebi'i, <sup>27</sup>pues la'a mísmuba Tatáa nna catsi'ínie le, porqui'ni lebi'i nna chi catsi'íni le inte' nna chi ríalatsi' le qui'ni birí'a' làti dua Tata Dios. <sup>28</sup>Gùdaya' de ru'a lo Tatáa nna gul'lania' yétsiloyu, pero annana guthá'na' yétsiloyu nna éya'a' attu làti dua Tatáa. <sup>29</sup>Làniara ra ca discípulo qui'áa ne: Annana chi rinèni cuiã'lu' intu' para qui'ni ttélini tu' claru taá, pues labiru biya comparación ní runi cuiã'lu'. <sup>30</sup>Annana ritelíni tu' qui'ni hua yù bá cuiã'lu' iyaba ca cosa, acca labí caduel-la' qui'ni nuya inàba titsa'ã cuiã'lu' adí; por nui nna ríalatsi' tu' qui'ni da' cuiã'lu' de làti dua Tata Dios. <sup>31</sup>Jesús nna ra tie cabi: Tsí hualigani chi ríalatsi' le cá. <sup>32</sup>Chì' taáníduã gal-la' hora, pero a'hua chi gùl-la' hora qui'ni gathilàlia le nna gàtti' tébã néda thí' le, áturúbã inte' guthà'na le. Pero labí ná teruba', sino qui'ni Tatáa nna dùe lani inte'. <sup>33</sup>Ca títisi' nna chi gunénia' le para qui'ni gappa le adí confianza lani inte' nna gata' la'yeni lo losto' le. Le' yétsiloyu nna nuýébã ná nu thacca' le; pero licuèquua tsittsi' latsi' le, porqui'ni inte' nna chi benia' vencer yétsiloyu.

**17** Beyacca diba gunne Jesús ca títisi' nna, guchitha tè lúe yiabara' benie oración nna rèe: Tata Dios quia', chi gùl-la' hora nna rinába'a qui'ni

gudàliani cuià'lu' Īi'ni cuià'lu'ì, para qui'ni Īi'ni cuià'lu'ì nna gudàliani huée cuià'lu'. <sup>2</sup>Porqui'ni chi bete cuià'lu' la'huacca qui'e para queé Señor sobre iyábani ca enne', para gutie la'labàni nu labí ttíà qui' iyaba canu bete cuià'lu' làtsi' né'e. <sup>3</sup>Nui nna ná la'labàni para siempre: qui'ni gunibia' çà cuià'lu' porqui'ni tûteruba cuià'lu' ná Dios, à'hua Jesucristo enne' chi guthèl-la' cuià'lu'. <sup>4</sup>Inte' nna chi bedàliania' cuià'lu' le' yétsiloyu nna; chi birialània' tsina nu benna cuià'lu' gunia'. <sup>5</sup>Acça Tata Dios quia', bedàliani cuià'lu' inte' èxabá lani cuià'lu' lani la'a mísmuba la' dàliani nu guta' quia' lani cuià'lu' dèdèba ántesca cue' yétsiloyu. <sup>6</sup>Chi benia' cuià'lu' declarar ru'a lo ca enne' benna cuià'lu' làtsi' nàya' tse'e yétsiloyu; qui'ba cuià'lu' uccua cabi, pero chi benna cuià'lu' cabi làtsi' nàya'. Làcabi nna chi runi cabi obedecer titsa' qui' cuià'lu'. <sup>7</sup>Annana chi yù cabi qui'ni iyaba nu té quia' nna cuià'bálu' benna lu' à. <sup>8</sup>Porqui'ni chi gutixa'áni ya' cabi ca titsa' nu ra cuià'lu' inte'; làcabi nna chi beni cabi çà recibir nna chi ga'na cabi seguro qui'ni hualigani dáyá' de ru'a lo cuià'lu', à'hua ríalatsi' cabi qui'ni cuià'bálu' ènni'á' guthèl-le'e inte'. <sup>9</sup>Ratta'yúnia' cuià'lu' por làcabi; pero bihua ratta'yúa' por yétsiloyu, sino por ca enne' chi benna cuià'lu' làtsi' nàya', porqui'ni qui'ba cuià'lu' ná cabi. <sup>10</sup>Iyate nu ná quia' nna ná huá qui' cuià'lu'; à'hua iyate nu ná qui' cuià'lu' nna ná huá quia'. Làcabi nna chi rudàliani cabi inte' le' yétsiloyu. <sup>11</sup>Lanúruá' té

le' yétsiloyu porqui'ni néda taá chi déyu'á' para él-lania' làti dua cuià'lu'. Pero làcabi nna tse'e bá cabi le' yétsiloyu. Tata Dios Tsùna', rinabá'a' por iyaba ca enne' chi benna cuià'lu' lani inte' qui'ni hué' cuià'lu' cabi cuidado lani itute poder qui' cuià'lu', para qui'ni à'hua làcabi nna ccá ttùba la' rulábalatsi' qui' cabi tì'ba ri'u ná ri'u ttùba. <sup>12</sup>Ituba tiempo de gurénia' lani cabi le' yétsiloyu nna, bé'e ya' cabi cuidado según voluntad qui' cuià'lu'. Canu benna cuià'lu' làtsi' nàya' nna, seguru ni bé'e ya' cabi cuidado; nìdi ttu cabi labí gunitti, sino làteruba nu chi ná destinado dèdèba antes para nittíà, tì'a nu chi ra ba lo Escritura. <sup>13</sup>Pero annana chì' teníduà él-lania' ru'a lo cuià'lu', pero rinnia' ca tìtsi'ì miéntraste renífrua' le' yétsiloyu, para qui'ni gata' iýeni la' redacca' latsi' qui' cabi tì'a té la' redacca' latsi' lo lóstu'a'. <sup>14</sup>Chi betí'a' titsa' qui' cuià'lu' lani làcabi. Pero yétsiloyu nna ruyudí' lá cabi porqui'ni labí ná cabi ttùba lani yétsiloyu, tì'tehuá inte' labí ná' tnu yétsiloyu. <sup>15</sup>Bihua rinába'a' qui'ni cúa telá cuià'lu' cabi le' yétsiloyu, sino qui'ni gudilàa cuià'lu' cabi de lo nu ná mal. <sup>16</sup>Labí ná cabi nu yétsiloyu, tì'ba inte' labí ná' nu yétsiloyu. <sup>17</sup>Rinába'a' qui'ni guni cuià'lu' qui'ni ccá cabi yà'latsi' enne' losto' nàri' por medio de ca enseñanza qui' cuià'lu'; titsa' qui' cuià'lu' nna ná puru taá nu ná lí. <sup>18</sup>Tì'ba guthèl-la' cuià'lu' inte' yétsiloyu, à'hua inte' nna rithél-la' ya' cabi para tsía cabi ituba yétsiloyu. <sup>19</sup>Inte' nna nì bá riria látsa'a' la'labàni quia' nna gutée

ya' a por làcabi, para qui'ni làcabi nna ccá huá cabi yà'latsi' enne' losto' nàri por medio de ca titsa' lí qui' cuià'lu'. <sup>20</sup>Ratta'yúa', pero aláa tsuà' teruba por làcabi, sino a'hua por adí canu tsíalatsi' cabi inte' por predicación qui' cabi, <sup>21</sup>para qui'ni iyaba cabi nna ccá ttùba la' rulábalatsi' qui' cabi tì'ba cuià'lu' Tàta lo lóstu'a' a'hua inte' lani cuià'lu', qui'ni a'hua làcabi nna ccá cabi ttùba lani ri'u. Anía modo nna tsíalatsi' ca enne' tsè'e yétsiloyu qui'ni cuià'bálu' guthèl-le'e inte'. <sup>22</sup>La' dàliani nu benna cuià'lu' quia' nna, chi betée ya' a lani làcabi, para qui'ni ccá cabi ttùba tì' tehuá ri'u ná ri'u ttùba; <sup>23</sup>inte' lo losto' cabi, a'hua cuià'lu' lo lóstu'a'. Anía modo nna ccá cabi completamente taá ttùba, para qui'ni ca enne' tsè'e yétsiloyu nna ennia cabi cuenta qui'ni cuià'bálu' guthèl-le'e inte' nna catsi'íni cuià'lu' cabi tì'tehuá catsi'íni cuià'lu' inte'. <sup>24</sup>Tata Dios, canu chi benna cuià'lu' para ccá cabi enne' quia' nna, calátsa'a' qui'ni làti thú'a' nna tsé'e huá cabi lani inte' para qui'ni ila'ni cabi la' dàliani nu chi benna cuià'lu' quia'; porqui'ni catsi'íni cuià'lu' inte' dèsdeba antes càla cue' yétsiloyu. <sup>25</sup>Tata Dios quia', tulidàba ná cuià'lu' enne' completamente tsè', màsqui'ba ca enne' tsè'e le' yétsiloyu labí nabia'ni cã cuià'lu'; pero inte' nna hua nabia' te' cuià'lu', a'hua canu tsè'e lani inte' annana hualigani chi yù cabi qui'ni guthèl-la' cuià'lu' inte'. <sup>26</sup>Por medio de inte' nna chi nabia'ni cabi cuià'lu', a'hua chì' guniíruhuá' qui'ni gúnibia' cabi cuià'lu' adí,

para qui'ni la' tsì'latsi' nu té qui' cuià'lu' lani inte' nna thua huá lo losto' cabi, a'hua inte' lani cabi nna.

**18** Beyacca ba gunne Jesús ca titsa'a nna, beria tie nía nna hué lani ca discípulo qui'áa attu ládulá yò bitsi láa Cedrón. Nía nna re' ttu huerto. Gutà'a tè Jesús nía, a'hua ca discípulo qui'áa. <sup>2</sup>Judas nu gutiã ne cuenta nna nabia' huániã huértuã, porqui'ni iyé vuelta tsè' huía Jesús nía lani ca discípulo qui'áa. <sup>3</sup>Acca, taxi' chì Judas nuỹétse'ní ca soldado a'hua ca policia canu guthèl-la' ca sacerdote principal nna ca fariséua nna. Bitsina'a lani cã nía lani linterna yí l-le antorcha l-le, hàstaá espada l-le yù'u ná' quj. <sup>4</sup>Pero Jesús nna hua yù bée iyaba ca cosa nu guthácca' cã ne, acca birie táttse'e cã nna rèe cã: Nuni reyila le. <sup>5</sup>Becàbi cã nna ra cã ne: Jesús nu yetsi Nazaret. Làniana ra tè Jesús cã: Inte' bá nua'. Judas, nu beni còntre lani la' ruthacca'ỹí nna du huá lani cã. <sup>6</sup>Lótaã biyénini cã ra Jesús: Inte' bá nua', entonces bebíga' tè cã dàcca' cuè'e lá quj nna gubìxi chì cã loyu. <sup>7</sup>Bedenàba titsa' tie cã attu nna rèe: Núní reyila le. Làcã nna ra cã: Jesús nu Nazaret. <sup>8</sup>Becàbi Jesús nna rèe cã: Chĩyá nia' le qui'ni inte' nuã' nna, pues canchu inte' nuã' reyila le nna, pero líhue'él-la' ca enne' quíyí'í éyya cã cá. <sup>9</sup>De rèe anía nna, uccua cumplir ca titsa' qui'e loti' benie oración lani Tata Dios nna rèe: De lo iyaba canu benna cuià'lu' làtsi' nàya' nna, bè' ya' cã cuidado hasta el fin. <sup>10</sup>Làniana discípulo lá Simón Pedrua nna dèni bi espada,



gulèqquia bi ą le' vaina qui' nna bè' chì bi ttu nu ná siervo qui' enne' ná huexána' qui' ca sacerdotéa nna guchu bi yéti nàgui'ì lado bànì. Siérvuá nna láą Malco. <sup>11</sup>Jesús nna ra tìe Pedrua: Begú'u espada qui' lu'ą' lugar qui'ì. Tsi bihua yù lu' qui'ni inte' nna ga'na bá' dispuesto ccá' sufrir iyate nu chi nani Tata qui'ya'a qui'ni ttía'.

<sup>12</sup>Làniana ca soldádua lani capitán qui' caniá, ą'hua ca policia nu guthèl-la' ca judíua nna, iyaba cą bedàxu' chì cą Jesús preso nna bexìqquia cą ca né'e. <sup>13</sup>Guche' tề cą ne ru'a lo yà'la tề Anás porqui'ni uccuą suegro qui' Caifás nu uccua huexána' qui' ca sacerdotéa ida lànìa. <sup>14</sup>Caifás nuá bete consejo lani ca judíua nna rą qui'ni mejor la gatti tùteruba enne' tì'ca'la l-lúya latsì' itute yétsiá.

<sup>15</sup>Denó tề Simón Pedrua Jesús lani attu discípuuá. Nu ná huexána' qui' ca sacerdotéa nna nabia' bánią discípuuá, acca gutà'a tề discípuuá lani Jesús hàstaá le' corredor qui' enne' ná huexána' qui' ca sacerdotéa. <sup>16</sup>Pedrua nna gulèda ba bi ru'a puértaá lo néda lá. Làniana biria tề discípulo enne' nabia'i sacerdotéa nna gunàba bi permiso lani niula nu rue' cuidado ru'a puértaá qui'ni tté Pedrua liú'u. <sup>17</sup>Làniana ttu criada nu rue' cuiado ru'a puértaá nna ra tią Pedrua: Tsí álahua ná huá lu' discípulo qui' nubéyu'ą' cá. Pedrua nna ra bi ą: Labí ná'. <sup>18</sup>Dàa tề ca huenitsina nna ca policia nna ru'a tề porqui'ni yala idíl-la' cca lànìa acca becùà' cą yí'. Pedrua nna du hua bi ru'a ttèa lani cą.

<sup>19</sup>Nu ná principal entre ca sacerdotéa nna gunàba titsa'ą Jesús acerca de ca discípulo qui'áa, ą'hua acerca de biya nuá ruthète'nie cabi. <sup>20</sup>Becàbi Jesús nna rèe: Inte' nna dàcca'lo taá chi gutixa'ánia' ca enne', ą'hua tulidàba betía' enseñanza le' ca sinagoga nna le' templuą' làti retùppa iyaba ca enne' judíuą' nna, pues labí biya titsa' gáttsi' ní chi gunnía'. <sup>21</sup>Biánicca rinàba titsa' lu' inte' nì'i. Nà' bá gunàba titsa' canu chi biyénini cą ca enseñanza nu gutixà'a'; pues làcą nna hua yù bá cą nu gunnía'. <sup>22</sup>Lótaá ra Jesús anía nna, ttu policia nu du guardia nía nna gutìni ní'ì lúe nna rą ne: Tsí ą' dani lu' ecàbini lu' nu ná sacerdote principal cá. <sup>23</sup>Becàbi Jesús nna rèe na: Canchu gunnía' ca titsa' nu làa dacca' inne ri'u nna, pues gùnà biya mal ní nuą' níá'; pero canchu hualiba nu níyi'ì nna, biálacca rue' lu' inte' nì'i. <sup>24</sup>Bitola nna guthèl-la' Anás ne ru'a lo Caifás nu ná meru gani huexána' qui' iyaba ca sacerdotéa.

<sup>25</sup>Du bá Pedrua ru'a ttè huètsa'a nna ra tề cą bi: Ttu discípulo qui' nubéyu'a hua ná lu' ála. Pedrua nna labí guý'che' bi sino ra lá bi: Labí ná'. <sup>26</sup>Làniana attu siervo qui' nu ná huexána' qui' ca sacerdotéa, pariente qui' nu guchu Pedrua yéti naga' niá nna rą bi: Tsí álahua lu' nuá bilá' te' lani Jesús nà' le' huértuą' cá. <sup>27</sup>Labí guý'che' Pedrua attu vuelta. Lànìa taá nna gurètsi chì xcurúdiá.

<sup>28</sup>Díla to' ba lànìa nna gulèqquia cą Jesús le' yú'u qui' Caifás nna guche' cą ne le' lí'a palacio qui'

governador Pilato. Ca judíua nna labí gutà'a cą le' paláciuá, porqui'ni según bá costumbre qui' ca judíua nna ná tul-la' canchu gá'a cą le' yú'u qui' canu labí ná raza judío, entonces labí cca go cą para guni cą celebrar fiesta nu reya cą pascua. <sup>29</sup>Làniiana biria Pilátua gunènią cą nna rą: Biani queja ní rutsia le contra nubéyu'í. <sup>30</sup>Becàbi cą nna ra cą: Cáalá bihua mal benią nna, labí tahua' tu' ą ru'a lo cuią'lu'. <sup>31</sup>Pilátua nna ra tía cą: Lithi' bá ą nna liguni ti'iyá calatsi' le lani ą según bá nu ra lo ley qui' le nì'iyá. Becàbi ca judíua nna ra cą na: Gobierno qui' cuią'lu' labí runną qui' tu' derecho para gutti tu' nuýa. <sup>32</sup>De ra cą nía nna gùdulo uccua cumplir nu chi ra Jesús para ttelíni biýa clase de lù'uti ní ná qui'ni gattie. <sup>33</sup>Làniiana gutà'a Pilátua le' paláciua attu nna benią mandado qui'ni tahua' cą Jesús ru'a lúj. Làniiana gunàba títsa'ą ne nna rą: Tsí rey ná lu' qui' ca judíua' cá. <sup>34</sup>Becàbi Jesús nna rèe na: Tsí ra lu' nui lani propio ba la' rulaba latsi' qui' lu', o, tsí nuýaáruá rą lu' nu cca quia' áccá. <sup>35</sup>Becàbi Pilátua nna rą ne: Tsí ína ri'u judío ná' cá, pues ca sacerdote principal qui' ca judíua lani adí ca enne' yetsi' qui' lu'ą' bá chi bete cą lu' cuenta lani inte'. Biani beni lu'. <sup>36</sup>Becàbi Jesús nna rèe na: La' rigú'ubia' quia' nna labí ną nu yétsiloyuį; cáalá nu yétsiloyuį bá ná la' rigú'ubia' quia' nna, entonces ca amigo quíya'a nna gutil-la lá cą lani canu bedàxu' cą inte' preso para qui'ni làa gute cą inte' cuenta làtsi' ná' ca judíua'; pero la' rigú'ubia'

quíya'a nna labí ną nu nì. <sup>37</sup>Ra tè Pilátua ne: Entonces, rey ná lu' álá. Becàbi Jesús nna rèe: Cuią'bálu' chi ra qui'ni ná' rey, pues para nui bá chi gùlia', ą'hua para nui huá chi dú'a' le' yétsiloyuį para quixa'a' nu ná lí; iyaba canu ríalatsi' qui' nu ná lí nna rudà naga' qui' quia'. <sup>38</sup>Pilátua nna rą ne: Biani nua' nu ná lí nì'i. Beyacca bá rą anía nna birią attu làti ribèda ca judíua nna rą cą: Nìdi ttu falta làa retsèla te' qui'í; <sup>39</sup>pero lebi'í nna té costumbre qui' le rinàba le qui'ni gudilá'a' ttu preso tsá pascuį. Tsí hua calatsi' le gudilá'a' rey qui' lebi'í ca judío cá. <sup>40</sup>Làniiana iyaba cą idítsa tsè' guretsiyà'a cą attu nna ra cą: Alàa nui l-lá, sino Barrabás. Barrabás nna tía litsi' ìyyà porqui'ni uccuą ubànà.

**19** Làniiana beni Pilátua mandado gudàxu' cą Jesús nna hué' cą ne lani cuarta. <sup>2</sup>Ca soldádua nna beni cą ttu corona yèttse' nna gulù'u cą na íqqie. Begàccu' tè cą ne ttu lári' morado. <sup>3</sup>Làniiana gutìni ná' qui' lúe nna beni tè cą ne burla nna ra cą: Viva, Rey qui' ca judío. <sup>4</sup>Làniiana biria Pilátua attu nna rą ca judíua: Nì che' ya' ą ru'a lo le para ennia le cuenta qui'ni nìdi ttu falta làa retsèla te' contri. <sup>5</sup>Biria tè Jesús yù'u íqqie corona yèttsi'a nna nàccu'e lári' morádua nna. Làniiana ra Pilátua cą: Nì bá rúdú ya' ą ru'a lo le. <sup>6</sup>Ca sacerdote principal nna ca policia qui' canía nna bilá' bání cą ne nna, yala idítsa guretsiyà'a cą nna ra cą: Betaá' ą lo curutsi, betaá' ą lo curutsi. Ra tè Pilátua cą: Líthi' ą lebi'i bá, liutá' ą lo yà curutsi, qui'ni inte' nna labí biýa falta retsèla te' qui'í. <sup>7</sup>Becàbi

ca judíua nna ra ca na: Intu' nna té ttu ley qui' tu'; según nu ra lo ley qui' tu'í nna cca ba merecer gattiá, porqui'ni la'a labá rudàlianiá nna ra qui'ni ná Ýi'ni Tata Dios. <sup>8</sup>Biyeni báni Pilátua ra ca anía nna, adí telá gùtsiniá. <sup>9</sup>Bedeyà'a gaábá attu le' paláciuá nna ra Jesús: Gání enne' ní ná lu'. Pero Jesús nna labí becàbinie na. <sup>10</sup>Acca Pilátua nna ra attu: Tsí bihua ecàbini lu' inte!. Tsí bíhuá yù lu' qui'ni té bá poder quia' para gunia' mandado qui'ni gatti lu' lo curutsi nna té huá poder quia' annana para gudilá'a' lu' nna. <sup>11</sup>Becàbi Jesús nna rè: Nìdi tí' poder labí té qui' lu' contra inte' sino por voluntad qui' Tata Dios enne' dua ÿiabara', acca adila tul·la' dàa nu betiá inte' cuenta làtsi' ná' lu'. <sup>12</sup>Dèsdeba làniana yala uccua latsi' Pilátua gudilà Jesús; pero ca judíua nna adila iditsa beni ca seguir gunne ca nna ra ca: Canchu gudilà cuiá'lu' nubéyu'í nna entonces labíru ná lu' amigo qui' César enne' romano ná rey, porqui'ni nuña diba rudàliani la'a labá rena qui'ni ná rey, pues á' modo nua runiá contra César. <sup>13</sup>Biyeni báni Pilátua ra ca anía nna, gulèqquia tiá Jesús fuera. Làniana gùdua tènía lo xila' xenia nu re' lo ttu plataforma nu de íyya, lani titsa' hebreo nna lã Gabata, làti ribeququia sentencia qui' ca enne'. <sup>14</sup>Tsá lánia nna ná tsá víspira qui' pascua, ttu tsì'nu hora tì'ga nuá nna ra Pilátua ca judíua: Nì bá du enne' ná rey qui' líi. <sup>15</sup>Pero làca nna guretsiyà'a ca nna ra ca: Gatti ba, betaá' a lo yà curutsi. Pilátua nna ra tiá ca: Tsí ína ri'u calatsi' le qui'ni gutá'a'

enne' ná rey qui' líi lo curutsi cá. Becàbi ca sacerdote principal nna ra ca: Lanuru attu rey té qui' tu' sino làteruba César. <sup>16</sup>Làniana bete Pilátua ne cuenta làtsi' ná' qui para gutà' ca ne lo curútsiá. Acca bedàxu' tè ca Jesús nna guche' ca ne para gattie. <sup>17</sup>Behuà'ni tè ca Jesús curutsi qui'áa nna, birie para lugar láq Iqquia Bega' Yatti, titsa' hebreo nna láq Gólgota. <sup>18</sup>Nía nna gùda ca ne lo curútsiá. Betàa' huá ca lo curutsi chuppa ca nubeyu'; ttuá ttu ttu lado, Jesús nna lahui'. <sup>19</sup>Bedia huá Pilátua ttu letrero betaá'á na iquia curutsi qui' Jesús: Letrérua nna ra: JESÚS ENNE' NAZARET, REY QUI' CA ENNE' JUDÍO. <sup>20</sup>Nuÿetse' ca judíua bíl·la ca letréruá, porqui'ni làti betàa' ca Jesús lo curútsia nna ga'ná exa taá ciudadad; a'hua letréruá nna gunniá tsùnna clase de titsa': titsa' hebreo nna, titsa' griego nna, titsa' latín nna. <sup>21</sup>Ca sacerdote principal qui' ca judíua nna ra tè ca Pilátua: Bittu gudua cuiá'lu': Rey qui' ca enne' judío, sino adila tsa' gúdia lá lu' qui'ni làganiá nna rena: Rey qui' ca judío ná!. <sup>22</sup>Becàbi Pilátua nna ra: Nu chi bedú'a' nna nà' dua bá. <sup>23</sup>Beyacca bá betàa' ca soldádua Jesús lo curútsia nna, guÿi' tè ca ca ÿuéa nna beni ca ca tappa l·là'a, ttu pedazo qui' ttu ttu ca soldádua. Guÿi' huá ca camisa qui'áa, pero nuá nna ná puro tejido taá dèsdeba íquiará' hàstaba ÿarèe!. <sup>24</sup>Làniana ra luetsi qui: Bittu ichèda' ri'u a sino gudàl·la ri'u rifa nuña la ri'u gal·la' ri'u a. Anía modo nna uccua cumplir nu ga'na lo Escritura làti ra: Gùl·la'ání ca ca ÿó ya'a nna,

Bedàl·la çà rifa lo quì.  
 Anía tegani beni ca soldádua.  
<sup>25</sup>Nàna qui' Jesús lani ÿìla bía,  
 à'hua María niula qui' Cleofas,  
 à'hua María enne' Magdála nna  
 dàa cabi exa taá làti du curutsi  
 qui' Jesús. <sup>26</sup>Bilá' báni Jesús nàna  
 qui'áa, à'hua discípulo enne' yala  
 uccuatsi'íni Jesús nna du huá bi  
 nía, làniana rèe nàna qui'áa: Niula,  
 nà' bá du ÿi'ni lu'á'. <sup>27</sup>Bitola nna  
 rèe discípuluá: Nà' bá du nàna qui'  
 lu'á'. Acca dèsdèba làniana bedi'  
 discípuluá María le' litsi' bi.  
<sup>28</sup>Gutè ba nuá nna, hua yù bá  
 Jesús qui'ni chía beyacca qui'e  
 benie iyábani tsina nu dé'e gunie.  
 Pero para qui'ni ccá cumplir iyátení  
 nu ra lo Escritura nu cca qui'e, acca  
 gunnie attu nna rèe: Ribítsia' inda.  
<sup>29</sup>Nía nna du ttu ré'è tsa'ti' bą  
 vinagre. Ca soldádua nna bedibìtha  
 çà ttu esponja lani vinágre nna  
 bedua çà na lo ttu yà nna betsini  
 çà na rú'e. <sup>30</sup>Beyacca bá gù'yèe  
 vinágre nna ra tiè: Iyaba chi uccua  
 cumplir. Bedètta' tè íqquie nna  
 gunne tè latsi'e idí' latsi' ní nna  
 gùttìe.  
<sup>31</sup>Tsá lània nna ná qui'ni guni  
 ca judíua preparar para pascua  
 qui' quì. Para qui'ni làa eyà'na ca  
 cuerpo qui' canu tá' lo ca curutsi  
 nía canchu chi gal·la' tsá edi' latsi'  
 caníá, yà'ni qui'ni tsá fiesta nna  
 ną ttu tsá ÿeni gani; acca ca judíua  
 nna gunàbani çà Pilátua permiso  
 para quíttśa telá çà ca latha canu  
 tá' lo ca curútsia para qui'ni gatti  
 xia çà nna ítua çà nía. <sup>32</sup>Bitsina' ba  
 ca soldádua làti dàa ca curútsia nna  
 gutíttśa taá çà latha ttu nu tá' nía,  
 anía tehuá gutíttśa çà latha áttu

nuá nna. <sup>33</sup>Pero gubiga' bá çà làti  
 tá' Jesús lo curútsia nna, bila'ni çà  
 qui'ni chi gùttie nna, labí gutíttśa  
 çà látھے. <sup>34</sup>Pero ttu soldádua nna  
 gudą ttu lanza ru'a costilla qui'e  
 nna biria tè réni nna inda nna.  
<sup>35</sup>Enne' bila'ni ca cosa nna ná bi  
 testigo acerca de nu uccua, acca nu  
 riquixá'a bi nna ną lígani. Làbi nna  
 yù bi qui'ni riquixá'a bi nu ná lí,  
 para qui'ni à'hua lebi'i nna tsálatśi'  
 le. <sup>36</sup>Anía modo nna uccua cumplir  
 nu ga'na lo Escritura acerca de lèe  
 ántesca bìtee yétsiloyu, làti ra:  
 Nìdi ttu tsitta yu'ée labí gáttsá.  
<sup>37</sup>À'hua attu lettia nna ra:  
 Iyètse' ca enne' ilá'ni çà Enne'  
 guda çà lanza.  
<sup>38</sup>Gutè díbá beni çà iyaba ca cosa  
 nna, làniana José enne' yetśi  
 Arimatea nna uccua hua bi ttu  
 discípulo qui' Jesús, pero labí  
 guréni bi dàcca'lo tè lani ca enne'  
 huíalatsi'a porqui'ni gùtsi báni  
 bi ca judíua. Làbi nna gunàbani  
 bi Pilátua permiso qui'ni edi' bi  
 cuerpo qui' Jesús. Pilátua nna bete  
 bą permiso qui' bi. Làniana huía  
 bi nna bedi' bi cuerpo qui' Jesús.  
<sup>39</sup>À'hua Nicodémua, enne' huía de  
 réla lá ru'a lo Jesús, làbi nna bitsina'  
 bi nùà' bi ttú chùà' kilo tì'ga  
 especias nu dacca' yaýi tsè' chixiá  
 mirra nna áloes nna yala iyixi  
 ril·làa' çà. <sup>40</sup>Guýi' cabi cuerpo qui'  
 Jesús nna, betùbi cabi e ca lári' lani  
 ca especia nu ril·làa' iyíxia, según  
 ná bá costumbre qui' ca judíua  
 canchu chi rucàttśi' çà ttu enne'.  
<sup>41</sup>Làti betàa' çà Jesús lo curútsia  
 nna re' ttu jardín. Le' jardíą nna  
 dua ttu bà nu puro taá íyyaá làti  
 lanú nuýa chi bigàtsi'. <sup>42</sup>Le' bàa

nna gutixa cabi cuerpo qui' Jesús, porqui'ni làteruba bàa ga'na adiru exa de làti betàa' cą Jesús lo curútsia, ą'hua porqui'ni chì tení ralla tsá runi ca judíua preparar para tsá ná qui'ni edi' latsi' qui'.

**20** Primero tsá qui' semana dílatò' ba hua náru chul-la nna, huía María enne' yetsi Magdala lo bà qui' Jesús. Bilá' tènì bi qui'ni chì bitua íyya xeni nu re' ru'a bàa. <sup>2</sup>Huía chì bi quèthani ru'a lo Pedrua ą'hua attu discípulo nu yala uccuatsi'íni Jesús nna ra bi cabi: Chi gutua cą cuerpo qui' Señor le' bàa nna labí yù tu' gaýa tahua' cą ne. <sup>3</sup>Pedrua lani attu discípulua nna huía chì cabi lo bàa. <sup>4</sup>Tulappa ba biria cabi, pero attu discípulua nna adí quetha bigàa bi ti'chu Pedrua, acca yà'la tè bi bitsina' ru'a bàa. <sup>5</sup>Bedètta' tè lo bi gunna' bi liú'u nna bila'ni bi ca lári' nu betùbi cabi e anta' cą nía; pero labí gutà'a tè bi. <sup>6</sup>Simón Pedrua enne' denál-la'á nna bitsina' ba bi nna gutà'a taá bi le' bàa, porqui'ni le' ttu bèlia xeni bá ná nuá gutixa cą cuerpo qui' Jesús. Bilá' huáni Pedrua ca lári'á anta' cą nía. <sup>7</sup>Bilá' huáni bi qui'ni lári' nu betètsi cabi iquua Jesús nna labí tsá'ą adí ca lári'á, sino qui'ni re' bą yà'latsi' ttùbą. <sup>8</sup>Làniana discípulo enne' denérua ą'hua yà'la tè bi bitsina' lo bàa, pues làbi nna gutà'a hua bi nna bila'ni bi ca lári'á, lànìa lá nna huíalatsi' bi. <sup>9</sup>Porqui'ni labí gutelí tènì cabi nu ra lo Escritura acerca de Jesús qui'ni náduel-la' eyáthee de lo lù'tuti. <sup>10</sup>Chuppa ca discípulua nna beyeqquia cabi litsi' cabi.

<sup>11</sup>Pero María nna du ba bi ru'a bàa ribetsi bi. Aníaba ribetsi bi

nna bedètta' lo bi nna gúnna' bi liú'u. <sup>12</sup>Bilá' tènì bi chuppa ca ángel tsíttsi tùnì ná yó cabi ýuàni cabi làti gutixa cą cuerpo qui' Jesús: ttu bi lado ýíquua lée, attu bi lado ýà nì'a lée nna. <sup>13</sup>Ca ángelia nna ra tè cabi María: Niula, biecca ribétsi lu'. Becàbi María nna ra bi: Chi gutua cą cuerpo qui' Señor enne' runia' adorar, labí yúá' gaýa gutixa cą ne. <sup>14</sup>Aníabá ra María nna, beyeqquia tè bi nna bila'ni bi Jesús dùe nía, pero labí bedácca'ni bi canchu lèe ènni'a. <sup>15</sup>Jesús nna ra tìe bi: Niula, biecca ribetsi lu'. Núní reyíla lu'. María nna belaba latsi' bi qui'ni jardinéruá bá nuá, acca ra tè bi: Señor, canchu cuią'lu' nua' gutua lu' e nna, gutixa'a bál-lani inte' gaýa tahua' cuią'lu' e, inte' nna edi' ye' e. <sup>16</sup>Jesús nna ra tìe bi: María. Làniana gunna' tè María attu nna bedacca' taáni bi e nna ra tè bi e: Maestro (titsa' hebreo nna rena cabi Raboni). <sup>17</sup>Jesús nna rèe bi: Bittu gulappa' lu' inte', porqui'ni labí nì'í éya'a' ýiabara' làti dua Dios enne' ná Tàta qui'a. Ná qui'ni tsía lu' làti tsè'e ca hermano quia' nna táyátsi cą qui'ni éya'a' ýiabara' làti dua Tàta quíya'a enne' ná huá Tàta qui' le, lèe nna née Dios quia', ná hué Dios qui' le. <sup>18</sup>Làniana deyya tè María enne' nu yetsi Magdala para equixá'ani bi ca discípulua ca noticia tsè' acerca de qui'ni chi bila'ni bi Jesús enne' née Señor, ą'hua qui'ni labé nna rèe bi ca così. <sup>19</sup>La'a mísmuba primero tsá qui' semana de gùl-là la nna, tsè'e ca discípulua jùntubá nna yáya tè ca puerta porqui'ni gùtsini cabi ca judíua. De repente taá nna bitsina'

Jesús nna gùdue lahui' cabi nna rèe: La'ÿeni para lo losto' le. <sup>20</sup>Beyacca ba rèe cabi anía nna, beluè'nie cabi ca né'e làti ná seña qui' ca clávuá. A'hua beluè'nie cabi ru'a costilla qui'áa làti guda çà lanza. Làniana ca discípulua nna yala bedácca'ni cabi de bela'ni cabi Señor. <sup>21</sup>Làniana ra Jesús cabi attu: La'ÿeni para lo losto' le. Raáruhué: Ti'ba chi guthel'la' Tatáa inte', pues a'hua inte' nna rithél'la'a' le. <sup>22</sup>Beyacca ba rèe anía nna, belùbie nna rèe cabi: Liguni recibir Espíritu Santo. <sup>23</sup>Nuÿa diba quixá'ani le qui'ni hua té perdón por ca tul-la' qui'ì nna, entonces huáta'nià perdón; pero nu labí quixá'ani le acerca de la' reyuniÿén latsi' qui' ca tul-la' qui'ì nna, entonces egà'na ba çà lànì a.

<sup>24</sup>Tomás enne' reya cabi Cuáchi'a, uccua huá bi ttu enne' tsì'nua nna, lanú bi té lani adí ca discípulua loti' gudu Jesús làti tsè'e cabía. <sup>25</sup>Ca discípulua nna gutixà'ani cabi Tomás nna ra cabi bi: Chi bila'ni tu' Jesús enne' née Señor. Tomás nna ra tè bi: Canchu bihua ilá' te' le' né'e nna ugá'a tè ÿubenàya' làti guda çà clávuá, a'hua canchu bihua ugá'a nàya' làti guda çà lanza costilla qui'áa nna, labí tsálátsa'a'. <sup>26</sup>Xunu' ubitsa bitola nna de tsè'e ca discípulua jútubá, lànìa nna chi re' Tomás lani cabi. Ca puerta nna yáya bá çà. Jesús nna gudu tie attu lahui' cabi nna rèe: La'ÿeni para lo losto' le. <sup>27</sup>Jesús nna ra tie Tomás: Bèga'a ÿubená' lu' le' nàya' nna gùnna' tsè' taá, bèga'a tè ná' lu' cuitta'a' làti guda çà lanza, para qui'ni làa gudu chùppaniírua

latsi' lu', sino ccá lu' ttu nu ríalatsi'.

<sup>28</sup>Becàbi tè Tomás nna ra bi e: Cuiq'balu' ná Señor quia' nna Dios enne' gunia' adorar. <sup>29</sup>Jesús nna ra tie bi: Hàsta'na bila'ni lu' inte' nna huíalatsi' lu', álá Tomás. Pero inte' nna nia': Icca'rubà canu ríalatsi' qui' màsqui'ba labí bila'ni çà inte'.

<sup>30</sup>Jesús nna benií ruhuée iÿétse'éru ca milagro bila'ni ca discípulo qui'áa, pero labí ga'na çà escrito lo líbruì. <sup>31</sup>Pero ca nui nna chi ga'na çà escrito, para qui'ni gata' fe qui' le lani Jesús nna tsíalatsi' le qui'ni née Cristo ÿi'ni Tata Dios enne' ná qui'ni ita le' yétsiloyu nna, para qui'ni gata' la'labàni cúbì nu gúnnee qui' le.

**21** Bitola nna bitsina' Jesús attu ru'a lo ca discípulo qui'áa, loti' tsè'e cabi ru'a indatò' láq Tiberias. Iì modo gùdue ru'a lo cabi: <sup>2</sup>Simón Pedrua lani Tomás enne' reya cabi Cuáchi'a, a'hua Natanael enne' Caná qui' Galilea, lani ca ÿi'ni Zebedéua, a'hua áchúppa ca discípulo qui'áa nna, jútubá tsè'e iyaba cabi. <sup>3</sup>Simón Pedrua nna ra tè bi cabi: Dí'a' huedàxu' bél'lá. Làcabi nna ra cabi Pedrua: Hua da' huá tu' lani lu'. De ra cabi anía nna día tè cabi nna gutà'a cabi le' ttu barco. Pero yèlàa nna nìdi ttu bél'la labí bedàxu' cabi. <sup>4</sup>Lótaá da' ràni'a nna bitsina' Jesús ru'a indatù'a, pero ca discípulua nna labí bedácca'ni cabi qui'ni Jesús bá ènni'a. <sup>5</sup>Acca ra tie cabi: ÿi'ni to' quia', tsí hua té tí'ni le biÿa go ri'u. Becàbi nna ra cabi e: Labí té. <sup>6</sup>Jesús nna rèe cabi: Liudàl:là exxa' lado bàni qui' bárcua' nna, hua taxácca' le bél'lá. Bedàl'la tè

cabi a le' inda hasta qui'ni labiru retèl'la'ni cabi a de tántuání idi'áa por iyé ca bél'la biyàxù'. <sup>7</sup>Làniana discípulo enne' yala catsi'íni Jesús nna ra bi Pedrua: Señor qui' rí'ua ba ènni'a'. Biyéni báni Pedrua qui'ni Señor bá ènni'a nna, guyi' tè bi ttu lari' nna bitètsi bi a porqui'ni labí yó bi nàccu', làniana bitsía chi bi guta'a bi le' indatù'a. <sup>8</sup>Làniana deyya tè adí ca discípulua para ru'a indatù'a lani bárcuá, alategá idittu' tsè'e cabi de yúbitsi, ttú gayua' metro teruba nna dené'yabání cabi exxa nu déyu'u ca bél'la. <sup>9</sup>Beyàdi cabi loyu nna, bila'ni cabi qui'ni re' yí' nna tsà ttu bél'la lo yí'a, a'hua ettaxtíla nna. <sup>10</sup>Jesús nna rée cabi: Litàxi' tuchùppa bel'la canu chi' bedàxu' taá lía'. <sup>11</sup>Huappi tè Simón Pedrua le' bárcuá nna beyé'yabání bi exxa para lo yúbitsi tsá'ti'niã puro taá ca bél'la xeni, gayua' tsí'nutsè' eyóna'; tutsáníayã çã, atsi'íni labí bitsu' exxa nna. <sup>12</sup>Jesús nna ra tìe cabi: Libíga' nna, ligò. De biyénini ca discípulua rée anía nna, nìdi ttu cabi labí beyáyani cabi inàba titsa' cabi e: Nuni ná cuiã'lu'. Porqui'ni chì bá bedácca'ni cabi qui'ni Señor Jesucristo bá ènni'a. <sup>13</sup>Gubiga' tè Jesús nna gùyi'e ettaxtíla, gutithie qui' cabi, a'hua ca bél'la nu tsà lo yí'a nna. <sup>14</sup>A' modo nna uccua tsunna vuelta gudu Jesús ru'a lo ca discípulo qui'áa dèsdeba loti' beyáthee de lo lù'utiá.

<sup>15</sup>Beyàcca ba gutò xtilà cabi nna ra tè Jesús Simón Pedrua: Simón yi'ni Jonás, tsí hua catsi'íni lu' inte' adiru tì'chu catsi'íni cabi inte' cá. Becàbi Pedrua nna ra bi

e: Señor, hua yù bá cuiã'lu' qui'ni yala catsi'í te' cuiã'lu'. Jesús nna rée bi: Gute lu' alimento qui' ca carnero to' quia'. <sup>16</sup>Jesús nna ra tìe Pedrua attu: Simón yi'ni Jonás, tsí hua catsi'íni lu' inte' cá. Becàbi Pedrua nna ra bi e: Señor, hua yù bá cuiã'lu' qui'ni yala catsi'í te' cuiã'lu'. Jesús nna ra tìe bi: Hué' lu' cuidado ca carnero to' quia'. <sup>17</sup>Gunne Jesús nu cca tsunna vuelta nna rée bi: Simón yi'ni Jonás, tsí hualigani yala catsi'íni lu' inte' cá. Pedrua nna yala ní behuiní'ni bi de qui'ni chi uccua tsunna vuelta rée bi: Tsí hua catsi'íni lu' inte'. Acca becàbi bi nna ra bi e: Señor, iyábani hua yù bá cuiã'lu', a'hua hua yù cuiã'lu' qui'ni demasiáduni catsi'í te' cuiã'lu'. Jesús nna rée bi: Hué' lu' ca carnero to' quia' go çã. <sup>18</sup>Hualigani te' riquixa'ánia' lu': Loti' naáru lu' áti'to' tè nu cuèti'la nna, ttùba lu' gùthi lè'e lu' nna huía lu' gaýa tediba uccua latsi' lu'; pero canchu chi ccá lu' enne' gùla nna, itsilani ca ná' lu' nna, làniana attu nu huaya' lá nna guýiqquiã çã nna iche' tìã lu' làti labí calatsi' lu' tsía lu'. <sup>19</sup>Anía ra Jesús para ttelíni ti'iýa ná la'tté qui' Pedrua canchu chi gatti bi nna thaliani Tata Dios por amor nu té lo losto' Pedrua lani e. Raáruhuá Jesús bi: Tanó inte'.

<sup>20</sup>Bedèqquia lo Pedrua nna bila'ni bi qui'ni denó huá discípulo enne' yala uccuatsi'íni Jesús, pues la'a mísmuba discípulo nuá guxua iquiquia bi ýiquiquia Jesús nna ra bi e: Señor, núní nua' guniã contra cuiã'lu' lani la' ruthacca'yí cá.

<sup>21</sup>Bilá' báni Pedrua qui'ni denó bi nna, acca ra tè bi Jesús: Señor, nui



chú nná, biani thacca'a. <sup>22</sup>Jesús nna rée bi: Canchu càla látsa'a' qui'ni lą nna eyà'na bą hasta qui'ni ìta' attu nna, biánícca ccá lu' saber nì'i, pues làdi qui'ni lu' nna tanó lu' inte' tulidà taá. <sup>23</sup>Ca títsa' nu gunèni Jesús Pedrua nna uccua çą ttu dicho entre ca hermanos, belaba latsi' quį qui'ni discípulua nna labí gatti bi. Pero Jesús nna labí rée Pedro qui'ni labí gatti discípulúa, sino: Canchu calátsa'a' qui'ni lą

nna eyà'na bą hasta qui'ni ìta' attu nna, biánícca ccá lu' saber nì'i. <sup>24</sup>Là discípulua nui ná testigo acerca de ca cosį nna bedia huá bi çą lo ìttsì. Intu' nna yù huá tu' qui'ni nu riquixá'a bi nna ną nu lígani. <sup>25</sup>Hua téru iýtse' ca cosa nu beni Jesús. Cáalá té posible para gudía ri'u ttu ttu tsa çą lo ìttsì nna, ti' cca te' qui'ni labí ccání yétsiloyu iyaba ca libro nu quixa'a iyate nu benie. A' uccua.